


BIBLIOTEKA

Zakł. Nar. im. Ossolińskich

XVII

1864



E. 24, 209.

HISTORIA

rerum in Polonia gestarum

ANNO M. DC. XX

recens in Academia Cracouiensi,
annuatim ad seræ tantum posteritatis memo-
riam, scribi instituta: nunc tamen permissu
Superiorum in lucem edita.

AUTHORE

*Et hoc recenter anno Academiæ electo
Historiographo,*

JOANNE INNOCENTIO PETRICIO
*Medicinæ & Philosophiæ Doctore, ac pu-
blico eiusdem in Academia Craco-
uiensi Professore.*



CRACOVIAE,
Ex Officina Typographica Francisci Cesarij.

12.286

1622 [?]

IN STEMMA ILLVSTRISSIMI



O seris narranda nepotibus, Et propè ab ipso
Lucis Presulee, stemmata ducta polo.
Quantùm exinde sibi atque aliis afflastis honorem
Tantum etiam existinc Historia hæc capiet.

M. Jacobus Vitellius Coll: Minor.

XVII - 1864 - III

III^{mo} & Reu^{mo} Principi,
D. MARTINO
SISKOWSKI EPISCOPO
CRACOVIENSI, DVCI SEVERIEN.
ACAD: CANCELLARIO, &c.&c.

Domino & Patrono colendissimo.



*N*unquam ego, SENATOR & PRÆ-
SVL AMPLISSIME, conquirendo-
rum quæ ubicunq; gentium præclare
gesta sunt, diligentiam improbaui:
eorum tamen consuetudinem lauda-
re haud potui, qui domesticorum incuria, externa
tantum suspicientes, virtutem incultu obsolescere si-
nunt. Etenim sicut non parua boni ciuis commenda-
tio est, patriam ornare: ita haud minor patriæ pestis,
despectu suorum, emulationi & gloriæ viam, indoli
vitam tollere. Animaduerti in tales alibi solitum
legimus; & merito: Spartam enim quam nactus es,
vel orna, vel desere. Ideoq; non tantò pere trophæa il-
la, arcus, corone, statuae, virtutem ubiq; laudatarum
gentiū tenebant: quantò pere popularium ore reddi-

ea cuiq; gloria accendebat, ut cum se Brutos, Themis-
 tocles, Leonidas; Romanos, Athenienses, Sparta-
 nos audiebant, à moribus sue quisque familie aut po-
 puli, velut à natura abire nequaquam poterat. Neq;
 verò nostra tempora, ea operum sterilitas tenet, ut
 externa suspiciendo, velut in alieno triumpho versari
 necesse sit. Mitto enim ardens & infixum cuiq; po-
 pulo fame desiderium. mitto ingentes illos, qui iam
 annalium paginas compleuerunt viros. videre videor
 hoc quod descripturus sum prelio, insignes fortissimo-
 rum bellatorum Duces, primipilos, aliamq; centurio-
 num & militum cateruam, inter cumulos corporum
 armorumq;, inter tabem sanguinis, egrè per aduersa
 vulnera, fessaq; cedibus membra animam trahentes.
 Quid? num virtutem illorum Manliis, Torquatis,
 Regulis, Sergiis donas? en Zolkeuius truncate caput
 adiciens dextere, querit: an eam Sceuole largiris?
 quin & Konecpolscio, dum ad corpus college dimicat
 M. Fabium aduocas. Superantne Decii duos Zolke-
 uios, Korecium, Balabanum, Kasanouiium, Ferens-
 bachium, Dinophium, Wrzescium, Koualkouiium,
 deuotis corporibus in hostes ruentes? Et Lubomirscii
 Comitis rara illa pro patria liberalitas, nū Q. Fabii
 tantum

DEDICATORIA.

*tantum virtus est? Cedunt scilicet P. Valerio Duces
 Zbarauij in planū oppida agentes? Cedūt Corculis,
 illa prudētia; illa sapientia? Cedit Papyrio Chotkeui-
 cius illo corporis robore, illo animi? Victus fortasse est
 VLADISLAVS Princeps virtute Scipionis Afri-
 cani? exhorruit funestam terram! ubi iuueni pari-
 ter, inter duorum Imperatorum funera, contra for-
 midolosum toti orbi hostem res gerendæ erant? Et
 ne singula commemorem, quid Senatus noster? per
 tot mala & seruitutem orbis sospes, ingentibusq; ini-
 micitiis superstes, cuinam inuidet imperium vel li-
 bertatem? Ergo non peccavi, Præsul Illustrissime,
 dum trophæa hæc domi collecta venerabūdus ad tem-
 plum Tuum Virtutis & Honoris porto; ubi ad arā
 vitæ & morum Tuorum, æterna tibi gloria, faustæq;
 omnium acclamationes adolentur. Non peccavi,
 inquam, siue illa, siue Te considero. Illa, heroibus tan-
 tum, excelsæ virtuti, & talibus qualis es Tu propria:
 Te, ex cuius splendore, sicut aquilæ ex sole, ita egre-
 griæqueq; indicia sua sumunt. Tacebo enim nunc di-
 uinis virtutes Tuas, quibus eodem loci, ubi Deum
 veneramur, inter aras & altaria Sacerdos colluces.
 Mittam honores Tuos, quibus sublimis in Regno E-*

EPISTOLA

piscopus, & inter Episcopos Senator radias. à Deo
 ista Tibi destinata erant, neque illis qui fastigia hæc
 conferre poterant, eligendi Tui potestas, sed gloria
 relicta fuit; Tu hæc debita virtutibus Tuis nascen-
 do statim meruisti. Transibo quantacumq; illa sint;
 Clerum ad antiquum virtutis habitum, id est, ad si-
 militudinem Tui reformare. adducere in Episcopam,
 dilectam Tuam Spartam, quicquid usquam egregii:
 tot institutiones, tot supplicationes, tot grates, toi
 preces, tot templis donaria: videlicet ut omnes disce-
 rent, Deum pariter ea pietate, qua Tu colere. Non
 commemorabo Hierosolymitanas illas diuitias, neque
 in secunda religionum Italia, alibi quam Rome &
 Bononiæ collocatas: à Te velut septem mundi ni-
 racula, ad septem ecclesias Cracouiam deducias.
 Ipsa templa tam raris ab illa celesti Christi in
 terris vicaria sede Apostolica, muneribus cumuata;
 quantum religionis per Te acceperint, augustinere in
 dies vultu & celebritate testantur. Sed in Episcopa-
 tu quicquid Tui muneris erat fecisti, in quo nonne
 interfuit patriæ ut Episcopum Te haberet? vide
 quantum adhuc intersit, Episcopum Te tantum ha-
 beat, an etiam Senatorem. Non hoc dicam, quam
 Tu pol-

DEDICATORIA.

Tu polleas prudentia, consilio, auctoritate : quàm sis magnus in literis : quàm ardens in opere , firmus pro veritate, offensionum pro utilitate publica impavidus; omnes enim ista norunt quicunque Te norunt. Illud unum quomodo dicam ? cùm VLADISLAVS Princeps contra immanem barbarorum vim , fata omniũ nostrum in acie versaret ; cùm SIGISMUNDO Regi eodem tendenti , ubique conclamaretur ad arma, hominibusq; urbes, villes, vici, agri nudarentur. Quid ? sensisses te Cracovia principem Poloniae Urbem ? arcem insignium Regionum, illiusq; Coronae, quam tibi commissam, capiti Regio servare debuisti ? cùm Georgius Dux in Zbaras, Castellanus tuus, cum cohortibus & copiis suis, cum Rege adversus hostes processisset ? cùm Ioannes Comes in Tecyn Palatinus tuus, uniuersum nobilium robur, sub signa & vexilla euocasset ? cùm Gabriel Comes à Tarnow Capitaneus tuus ; cùm omnis equestris ordinis flos, viri, iuuentus, velut vno agmine Regem secuti te defererent ? Habuit Te solum SISCOVI Cracovia, qui dignitatis & salutis suae curam, sumptu & opibus Tuis contracto milite, libens susciperes, atq; ad sanam deũ, aras, focosq; eius, paludatus Pontifex

EPISTOLA DEDICATORIA.

*rifex excubares. Irem nunc inter signa & cohortes
 Tuas, inter vota & acclamationes, quibus Te nu-
 meroso stipatum milite, totus excipiebat populus: nisi
 plausus ille hominum & Tua gloria, publico conse-
 crata elogio, latè iam per omnem memoriam incul-
 cata iret, ceteris incitamento, ut quicumque post Te
 futuri sint, Tui similes sint, Tuoq; exemplo, in sena-
 toria libertate Æmilianum, in seruanda urbe Ca-
 millum, in suscipiendo discrimine Fabium imitentur.
 Ego quoque PRÆSVL ILLVSTRIS-
 SIME, in hoc operis mei introitu, imitatus illos, qui magnas
 urbes intrantes, primùm sacras edes, & dicata Nu-
 mini summo delubra adeunt; ad Te velut Vestalem
 ignem, perpetuo in templo Dei accensum venio, Pa-
 tere ô Antistes, primam hanc meam feturam, noui-
 tio partu elucubratam magnitudini Tuae sacrare.
 Patere hoc laboris mei rudimentum à fauoris Tui
 nutrimentis incrementum sumere. Sic enim & mi-
 bi, aduersus maligni liuoris incursus, robur: & quod
 aliis præstare solet, Historiæ meæ à Te veniet FAMA
 & ÆTERNITAS.*

Illustriss: Cels: Tuæ

deuotus obsequijs

Ioannes Innocentius Petricius Me-
 dicinæ & Philosophiæ Doctor.



HISTORIA

rerum in Polonia gestarum

Anno M. DC. XX.



RES factaq; Polonorum, ab anno
suprà Millesimum Sexcentesi-
mum, vigesimo, scribere aggre-
dior, prosperiore hâc in parte ve-
terum materia & conatu, cum
per mille circiter annos retrò,
crescentes opes, fortunamq; populi memorarent
pari eloquentiâ & libertate. Mihi in arcto &
anxius labor, dum graue annis Regnum, incerto
æuo vitaque, & in ipso exordio annum cruen-
tum accipio. Sed iram hanc Numinis, afflictis
eodem tempore alijs grauiore discrimine regnis,
in nos quoque referre liceat, meliore futurorum
voto augurioque nostro, & fasce ac sceptro
SIGISMUNDI III. Regis, quod felix hæcte-
nus Regnum, firmumque robur imperij præstat.
Eius ductu prosperitateq; Hieremias & Simeon
Principes Valachorum, oblato ipsi vectigali in
tutelam accepti. exutus Rosuana Transyluano-
rum Dux exercitu, paloque suffixus. Liuania ar-

*Intentio au-
thoris.*

*Res geste Si-
gismundi Re-
gis.*

A

mis

Historia Rerum

mis vindicata. Aditæ & fractæ, longinquitate secreta, ac penè incognita gentes. Smolenscum ciuitas, a Moscis vltra centum annos, non bello, sed proditione nostris crepta, ædificiis aucta, & validissimo ingentis arcis præsidio munita: obsidione bienni, ab ipso vastata, & in potestatem redacta. Tota Moschouia infestis armis perlustrata, & captus Imperator Basilus Suiscius, cum Ioanne & Demetrio fratribus, ante eius solium procubuit. Prussia pleno iure in imperium & ditionem nostrorum celsit. Seueria & Cernihouia Moschorum prouinciæ, à VLADISLAO Filio, paterno iussu exemploq; subiugata. Quin eiusdem Regis auspicio & fortunâ vastata a Kosfacis Turcarum Achilles, Techinia, Kozlouia, Otsakouia, Belgradum, Theodosia, Trapezuntium. & super alia insignium suarum vrbium excidia, Synopsis quoq; caput & regia Ponti, dum tempus mercatus ditem alioquin vrbem, maiorum opum specie compleuerat, graui ruina concidit. innox Præcopum expugnatum. Sed & mare tentatum; in quo Cicalæ Bassæ filius, victus & occisus: alter item Bassa, classe victa captus & in vinculis mortuus. territa Constantinopolis subitis armis, suburbiorum incendiis, incussa que sæpius Turcis Polonorum reuerentia. Et quòd solùm voce publicâ dixisse habeo, nil aduersum, etiam

*Vladislai filij
prima milita.*

*Kosacorum
aduersum
Turcas egre-
gia facinora.*

etiam iratis fatis, plus fortunam in nos potuisse, quàm domesticam discordiam.

Cæterùm vt negotij mei initium, ordinem, finem curatiùs differam; consilium mihi est ante pauca de Valachia, deinde Gratiano, causisque belli præmittere.

V Alachia in duas nunc partes diuisa est. vtraq; à meridie Danubium, ab occidente Transyluaniam contingit. quâ versâ in Septentrionem ad Tyram fluuium, nostrarumq; terrarum confinia vergit, Moldauia dicitur. Fluuius Moldaua, modicus licet, ibidemque Sossauæ aquis emoricens, tamen in nomen terræ eualuit, maiorq; pars eius Moldauia nominatur, nisi quâ montes ab oriente procurrentes, vltrâ nomen hoc submouent, veterique appellatione ibi tantùm Valachia manet, quæ etiam nunc Transalpina vocatur. Nostris contrà, propior pars Valachia, altera Moldauia dicitur. Cæterùm tota hæc regio, antea libera, primùm Daciæ, deinde Valachiæ nomen tenuit: internis postea dissidiis, plures dominos, mox appellationes, tandem seruitutem accepit. Defuncto enim Stephano, primo post Bazardum Principe, inter ambiguos qui nam in imperium deligeretur, inclinari res Valachorum coëptæ. Neque externus dominationi quærebat,

Valachia descriptio.

Vetus appellatio & liberias.

Initium & causa mutationis eiusdē discordia.

*Stephanus
tributariam
promittit Ca-
simiro Magno
Anno 1359.*

*Et Valachi se
sponte tutela
Polonorum tra-
dunt Anno
1376.*

*Rursus in fa-
ctum s. diuisi*

integrâ etiamnum Stephani domo, & superstiti-
bus duobus filiis Stephano & Petro. Sed quia po-
pularium fauor ad Petrum inclinabat, qui alio-
quin audacia promptus, proxima quæque corri-
piendo, apud turbidos potior habebatur: pro
Stephano, ius principum, mos patrius, & natura,
vt natu maior succederet stabat. præualuit ta-
men Petrus. Stephanus, quòd vnum subsidium
credebat, ad preces versus, vectigalem totam Va-
lachiam promittens, à Casimiro Magno Rege
Poloniæ, perducì se ad patrium fastigium orat.
Sed quamuis copiis eius resectus, ad gentile de-
cus euaserat; diu tamen per aduersa conflictaba-
tur. Nam Petrum ingenio violentum, super so-
litam fratribus inuidiam, amissi quoq; principa-
tus poenitentia, & secuta postea mors Casimiri,
acrius in Stephanum agebat. Quâ occasione
motæ aut accitæ Turcarum gentes, Bulgariam,
Seruiam, & quicquid à tergo erat occuparunt:
adeò proximo periculo exterritis Valachis; vt
spontè oblato perpetuo vectigali, iterum tutelæ
se & patrociniò nostrorum darent. Multùm id
ipsis ad animos & gloriam profuit. Nam neq; à
nostris tributorum magnitudine attriti, & Tur-
carum bellis celebres, alienâ fiducia, strenuè re-
tinebant libertatem & virtutem. Discordes
deinde, & domesticis factionibus fessi, dum do-
mina-

minationi implicantur; adducti sunt vt seruirent. Manebat quippe vetus adhuc inter succedentes de principatu dissensio: cui sæpius popularium fauor occasionem, & socios aut ministros turbarum dabat. Hinc armorum initium, & è propinquo pars fortunæ Turcis. Nam dum illi per acies occupantur: hi in adnexa & vicina irrumpere, castella, vrbes corripere: haud multum etiam repugnantibus Valachis, tædio præsentium, & vbi successu destituebantur, propensione etiam in hostes. Sed Turcæ satis iam eorum opibus aucti, vsurpandi iuris gratia, & quia ad omnes euentus vtilius id videbatur: partem Valachia quam nos Moldauiam vocamus, imposito nouo Principe distinguunt. in aliam quoque animis viribusque intenti: sed quæ etsi non perpetuo constans, neq; omnino aduersa; potentiam tamen nostrorum diu prætulit. Postquam verò Mahometi Secundo, Constantinopolis, & quicquid supererat Græciæ cesserat, tunc demum & ipsa ad Turcas conuersa. Creuit ex eo acris contentio. Nam & Poloni, veteri iure Valachiam sibi asserebant, & Valachi innatâ mobilitate, arma nostrorum in Turcas prouocabant. Atq; sub regno nostro hucusq; Valachia esset, ni ipsi hos illosq; prout inualuerant, vel pro libitu fouere assueti, tædij remedium, flagitiosâ apud vtrosq; perfidiâ quæssissent. Ad ex-

*Occasionem
Turcis occu-
pande Vala-
chia Transat-
pina.*

*Nec multo
post vsurpan-
da dederunt.*

*Alteri Vala-
chia non o-
mnino con-
stans.*

*Vsq; ad Ma-
hometem u.
Polonorum
amicitiam
prætulit.*

*Inde neutri-
fida.*

*Et à Polonis
ob frequen-
quentem per-
fidiam relictâ*

*Turcarum im-
perio concessit.*

*Turcarum in
landis Prin-
cipibus mos,*

*Valachis Ga-
sparus Gratia-
nus prepositus*

treum, quia nostris pretium bellorum & sanguinis, non nisi eorum perfidia erat; segniùs exinde publicis opibus adiuuabantur. Nobilium multi, ius Regni priuatis viribus sæpè vindicarunt: si perinde postea firma fuisset genti fides; quam nostris ex eius compressione tantum gloria. Ita publica quies, Turcis in occasionem vsurpandæ Valachiæ cessit. Mox sublata etiam libertate impositi Principes, non ex nobilissimis popularium, aut gente Turcicâ, sed vndecunq; oblati viles, obærat, quandoq; pudendâ origine vel seruitio. Neque id genus despectum apud Turcas, vltroque tales honoribus appetuntur; quia ex vilissimis minùs periculi: multi vt degeneris animi notam interpretantur. Sed maximè Christianis qui in ritus eorum transgrediuntur, ad alta aditus. His prouinciæ, decora militiæ, curæque imperij decernuntur, Turcis non regimen non dignitas patet, maius pretium est alibi nasci, & in Christum perituum esse. Valachis tamen velut solatio Princeps Christianus imponebatur. & hoc tempore, Gasparus Gratianus præerat. de cuius origine, fortunâ, & quia nostri belli pars magna fuit, paucis quoque expediam.

Germanus is erat (quamuis aliam ferri, de natalibus eius famam haud sum ignarus) Græcij
in

in Styria natus. Causa illi mutandæ terræ, domestica paupertas, & frater natu grandior fuit. Nam is coëmendarum gemmarum gratiâ Constantinopolim profectus, vbi negotiatio prouenerat, sedē quoque ibidem firmatâ, Gratianum admodum iuuenem eò transtulit. Illic in ministerio fratris adultus: mox mutando merces, terras & principes obibat. Auctæ hoc modo opes, & hæc ipsa diuagatio, breui ad non suæ spei & originis nomen inopinum extulerunt. Quippe delatus in Italiam, cum venundatis Principi Hetruriæ pretiosorum lapillorum mercibus, reditum Constantinopolim pararet; nouo quæstui redimendorum Turcarum, qui tunc captiui Liburni habebantur, animum adiecit. Delectu ergò ex nomine & conditione factò, ad octoginta circiter naui imponit, ac Constantinopolim reuehit. Vbi eò appulit, & hæc Turcis nuntiata sunt; confestim omnes accurrere: complere portus & littora: alius liberos, parentes, fratres, propinquos, sciscitari aut noscitare: alius illum & squalorem reuecti coetus mirari: quisque vt erat nouitate rei percitus in obuium, ille in plures cumulatâ admiratione spargere: velut insolita Christiani ea propensio in Turcas, & non lucri studium fuisset. Mox diffusus totâ ciuitate rumor, amplissimum homini præmium tulit.

Accer-

A fratre Constantinopolim inductus.

Negotiatione pretiosorum lapillorum sustentabatur.

Inde in Italiã delatus.

Turcas captiuos redimit.

Constantinopolim reuehit. Hinc Turcarum admiratione.

*Et Cæsaris fa-
uore.*

*Ducatum
Naxia & Byssan-
censem
adeptus.*

*Tandem Va-
lachia prepo-
nitur,*

*Sed Gratia-
nus ambiguus
dominandi.*

*Opes tantum
parabat.*

*Deinde suspe-
cta Turca-
rum & Vala-
chorum fide.*

Accersitum enim Achomates Cæsar, quod fi-
dum sibi putaret virum, Ducatu Naxiæ & Bissa-
censi excipit. Postea imperatâ legatione, ad
Mathiam Christianorum Imperatorem, quia ex
voto perfecerat, redeuntem Valachia auxit. &
accepere Valachi lati ut ferme ad noua imperia.

At Gratianus sublimis licet potentia; sæpè
tamen pristinam conditionem, inter insperatas
felicitates recognoscens, suspectas fortunæ blan-
ditias, & Turcarum beneuolentiam habebat.
ideoque dominandi ambiguus, palàm prouin-
ciam, clam verò ingentes opes curabat. Proui-
derat nempe Turcarum breues & infaustos fa-
uores; amicitiam aliquandiu prosperam, nun-
quam securam; Valachorum ut leuia ita infida
ingenia, potentiam inuidiæ odioque ambien-
tium obnoxiam. Nec defuit suspitioni cre-
dulitas, dum multi Turcarum, velut in satelli-
tium illi additi, nuntios, introitus, aperta, se-
creta, scrutarentur. Quapropter perinde Tur-
carum fauori, quàm fidei Valachorum diffusus;
diu meditata consilia, in alterutram calliditatem
intendebat; ut aut opes, quas tradita prouincia
pepererat, aliò transferret: aut Valachia Tur-
carum potestati deducta, firmiorem potentiam
per rebellionem faceret. Cupiditate partæ do-
minationis, ad retinendam prouinciam flexit:

in Polonia gestarum.

9

ac si præsentia minùs prouenissent; faciliori potestea curâ opibus: quàm dignitati consuleret. Igitur quod præcipuum videbatur, vt Turcarum potentiaë aliam opponeret, in partes nostrorum transgredi parat. Hoc enim pacto, & faciliores Valachorum animos, si in veteres dominos adduceret putabat, & oblatum restituendæ prouinciaë obsequium, exasperataque inuicem Turcarum & nostrorum odia, prompta & prospera quæque illi apud nos pollicebantur.

Tutiorẽ rebellione potensam sperans.

Valachiam Polonis tradere meditantur.

Sed quia bellum, omnium quæ cum Turca gesta sunt, maximè memorabile dicturi sumus; res quoque admonet, vt primordia causasque eius altius orsi aperiamus.

Digressio ad causas belli.

Quamuis enim publicè à nostris negligebatur Valachia; varios tamen motus, à Turcis possessa, apud populum, apud legiones, apud primores ciebat, etiam quibus negligenda videbatur, tamen indignabantur inter prouincias Turcarum, Valachiam tot annis à nostris habitam numerari darique. Vbi illam gloriam Tarnouiorum, Seniauiorum, Lasciorum, Visneuciorum, Zamosciorum, impositos arbitrio Turcico, hostiumque artibus infectos principes exturbantium? Neque deinceps fortium virorum animi teneri poterant, vtpote qui libertatem & æmulationem amabant, coër-

Valachiam à Turcis possideri agrè Poloni putabantur.

Aliquorũ illic egregia facinora.

B

citio-

*Dux Korecius
priuata arma
in Valachiam
insest.*

*Prospera diu
fortuna.*

*Demum in-
fausto uentu*

*Qua victoria
sublati Turca.*

*Bellum regno
Polonia infer-
re meditatur.*

citionem vt speciem feruitutis oderant. Quin-
non multò post Dux Korecius, usurpato exem-
plo, ope priuata, infestos in Valachiam exer-
citus inferebat, graui rabie & dolore Achoma-
tis Cæsaris. Magnis enim prælijs sæpè & fæli-
citer congressus, exercitus eius clade ingenti
excipiebat delebatque. Nec dubium habe-
batur, si à nostris adiutus fuisset, & resumi Va-
lachiam, & ipsum non capi potuisse. quod con-
trà factum, spem quoque & audaciam Turcis
in nos præbuit, cum fatali ipsius casu, velut illa
cunctos complexi victoria, animum etiam po-
tiundi nostri assumerent. Inuitabat quippe,
inter alia, Regnum accessu facile, nullis mon-
tibus clausum; gens laborum tolerans, multæ
solertiæ, bello strenua, ac si discordia, cæteraque
libertatis vitia abessent, prorsus inuicta. Ver-
sabatur & ante oculos, terra immensis diffusa
spatiis, in eaque copia sulphuris, nitri, plumbi,
æris, ferri, argenti, nerui & instrumenta bello-
rum; vbertas frumenti, numerus equorum pe-
corumque ac omnium vtenfilium, haud minus
magnifica, quàm opulentis etiam terris reperiri
suenta. Inuitabat denique auidos religio, quâ vo-
tuo obligatoque excindendorum Christiano-
rum odio imbui dicuntur; & insana persuasio, ali-
quando fore, vt soli totius orbis potiantur:

tum

tum verò illa fortuna, velut signo & omine, à Diis ad proferendum imperium accepto, in nos intenti. Cæterùm quia restincto priuati vnus bello, causa illis in publicum minùs suppetebat; ad antiqua reuoluti, Kosacorum incursiones obtendebant.

*Sed quia in-
sta causa de-
rat.*

*Kosacorū in-
cursiones ob-
tendunt.*

Duo horum summa nomina. Donensium & Zaporouiensium, Lissouienses enim falsò ad Kosacos ab aliquibus transferuntur, quamuis leuitate armorum pernecitateque in bellis ipsis similes agunt. Quippe legionarij sunt nostri milites, morem tantùm belligerandi, duce Lissouio, bello Moschouitico secuti, eundem nulla prorsus sede, cum authoris adhuc nomine tenent. Rectiùs tamen hos Velites, alios Kosacos dixeris. Donensibus, Don fluiuius Latinè Tanais, sedem & causam cognominis dedit. Zaporouiensium idem situs & origo, qua Borystheni propè finis est. Vasta illic omnia, continuisque ac velut sine fine campis deserta regio. vulgus agrestium, ex circumiectis Kiouia locis collectum, illuc transgressi, in nomen Kosacorum coaluit. Neque verò illud arandæ exercendæue terræ, alioquin fertilis studium eò induxit; sed prædarum ex hoste dulcedo, & vt quacunque circum iacent, vasta tamen & deserta essent. Tartari enim per solitudines vagari soliti, con-

*Kosacorum
genem.
Lissouienses.*

Donenses.

*Zaporouien-
ses.*

*Zaporouien-
sium sedes.*

*Cum Tartaris
prelia.*

iuges iam cum liberis armentisque illuc velut in neglecta promouebant. Hinc Kosacis materia raptus & gloriæ; iamque ad proximos iam longius clarescendo, velut aperta terra & licentia, ingens ad eos concursus, non multitudinis modo; sed nobilium etiam, quos exercendæ rei militaris studium eodem transferebat: aliorum, quos necessitas aut scelus patriâ exigebat. Neque illuc venientes, vrbes aut recta receptabant; sed vacuas solitudines æstate pererrando, hyeme rursùm domos quisque suas, aut adiectos Kiouix vicos repetebat. Stephanus Battorius Rex Poloniæ, donata ipsis ciuitate Terehtimirovia, quinquaginta eos millibus passuum, a Kiouia seiunxit. Ipsi deinde sponte in vltiora promoti, cum tandem Tartaros submouissent, Borysthenis insulas occuparunt. Id subsidium illis aduersùm fortuita, & occasio asuescendi ad officia naualium erat.

Ciuitas Terehtimirovia

Insulas Borysthenis occupant.

Inter insulas Tomakovka.

illic positis mapalibus habitant.

Ceteri per oppida disperguntur.

Præcipua insularum Tomakovvka, in qua genti radix est; nam alias, quamuis amaniore sæpè tamen deseruerunt. illic medio amni positis tantùm mapalibus habitant; pauci ob loci angustiam, sed incultu vrbium horridi, & quia periculis sepositi, cæteris ferociore. multitudine alia, quæ in dies crescit, latè per nostra oppida dispergitur. vbi quid subitum, aut in hostes excurrere illis consilium, data tessera eodem

dem confluit. Otio iterum suas quisque sedes repetit. fortissimi & bellicosissimi Tomakovv-kam regrediuntur. placet talibus locus, vbi Turcarum Tartarorumque imperijs adiecti, promptius clarescunt: ipso etiam periculoso aditu, velut à similitudine & inertia aliorum amoti. Nam Borysthenes, quamvis diu præceps sæuique decurrit, tamen obuius ipsorum insulæ, quæ inter aspera rupium hinc atq; illinc pressò eundum est, ingenti fragore ex alto decidit, & continenter montibus aliquot deiectus, aquisque semper è sublimi pendentibus, feruens adhuc & sonans, derelicto ad dextram aluei Corcica oppido, virtute quondam & sede Visneuecij celebri, mox Tomakovvæ insulæ aduoluitur; nomenque deruptorum & præcipitiûm, quæ euaserat ad Kosacos transfert. Illa enim Latine Cataractæ, nostris à similitudine liminum, vt quæ nouem, velut gradus, per ordinem posita videas Porohi dicuntur. Hinc quod ultra est, zá porohi, vnde & Kosaci Zaporouientes denominantur. Mutant tamen subinde id nomen & Nisouientes, sed ex re vocantur. Nam terra apparens illic depressior, ex decliui fluminis decursu Nis dicitur; quamvis non emiserim, ob eandem causam Voliniam vteriore, per quam Kosaci diffunduntur, Nis quoque à plerisque vocari.

*Borysthenis
Cataractæ.*

Porohi.

*Zaporouien-
ses aliquando
Nisouientes
vocantur.*

*Volinia vte-
rior Nis dicitur.*

B 3

Hæc



*Kosacorum
disciplina.*

Hæc de origine & sedibus Kosacorum celeberrima. Cæterum quod in turba mirere, multum iam inter eos, disciplinæ & solertiæ videas: per vexilla & turmas componi, præponere fortissimos, audire præfectos, nosse ordines, intelligere occasiones, suas leges, suos magistratus habere. Ad id tamen adduci non possunt, ut agros colant, solum conferant, sepiant, rigent. quicquid prælio partum, & sua cuique manus necessitatibus subuenit. Iners quippe videtur cum terra in annum contendere, quod alicunde possis citò sanguine parare. Quapropter crebræ illis in Pontum excursiones, ob faciles appulsus aliaque ad irrumpendum opportuna. nam Borysthenes ab insula quam colunt, vix centum millibus passuum amotus, illic affunditur marique miscetur.

*Excursiones
in Pontum.*

*Rekursus ad
causas belli.*

Sed Kosaci paruo Turcarum damno, diu mari se tenebant; donec continuis eorum apud nos expostulationibus, & nostrorum metu irritati, quantò magis exitio deposcebantur; tantò acrius in aperta quoque & vrbes eorum effunderentur. Et Turcæ siue ad tollendos Kosacos, promptius nos iniuria impulsuri; siue lacerando prouincias validius pro tempore bellum seruaturi, Tartaros quoque immittebant, eorumque turmis immixti, non furtim ut antè, sed palàm populabantur Russiam. Hinc nostrorum

*Turcæ Polonis
grauēs.*

*Tartaros im-
mittebant.*

frorum questus, mox ira, & vt aliquibus videbatur, remedium non nisi ex bello. sed non temere illud mouendum, & omnia, iure prius secundum pacta Sigismundi Primi experienda, ea sententia vincebat. Ergo mittebantur nuntij, fœdus & amicitiam memoraturi. irritum tamen conatu: cùm verbis benigna referrentur; re autem vetera continuarentur. Iamque in arma nostri inclinabant; ni Turcæ diluendis prolatandisque damnis callidi, vt super contro- uersias incursionum à Kosacis illatarum recuperatores decernerentur nostros rogando, multos spe quietis attinuissent.

Polonos de iniurijs exposcentes.

Excusationibus aut dilationibus ducebant.

Profecti igitur, è nostris, generalis exercituum imperator Stanislaus Zolkeuius: è parte Turcarum Skinder-Bassâ, (id erat Dalmatæ nomen, & honor perfidiæ) iusta vterque manu ad Bussam conuenerunt. Ibi Turcæ audaciam Kosacorum conqueri, vetera nouaque damna adducere: simul percensere numerum oppidorum, quæ quamuis essent nostra, tamen vt Kosacorum receptacula dirui volebant. Aduersum quæ Poloni obstinati, cum resolvere hoc facto vim imperij, totque oppida alieno arbitrio donum dare abnuerent; mox proferruntur à Skinder-Bassâ sui Imperatoris literæ, quibus ni Bersada oppidum cis Axiacem, vulgò par-

Recuperato- rius cū Turcis conuentus ad Bussam vulgò Comissi.

Illic Turcæ multa oppida vt diruerentur postulauit. Sed Poloni abnuentibus.

Ad unum oppidum nomine Bersadæ

par-

*controversia
deuoluitur.*

*Idq; propter
Basilium Bos-
sy clarum
Turcarum &
Tartarorum
victoris.*

*Poloni quie-
tem bello præ-
ponentes ad
id damnum
inclinant.*

*Sed quia op-
pidum Ducū
in Zbaras e-
rat.*

*Ambigui re-
sponſionis ad
Georgiū Du-
cem mittunt.*

paruum Borysthenem situm tolleretur; abire incæpto iuebantur. Ergo in id vnum omis-
sis alijs Turcæ incumbunt. nec quia tutos se in
posterum hoc damno sperarent; sed infensi op-
pido præfecti claritudine, & proprio dedecore.
Nam Basilius Bosſy, strenuus militiæ, acribusq;
in ea ministerijs præfecturam Bersadæ adeptus,
crebris illinc aduersum Turcas & Tartaros excur-
sionibus oppidanos assuefecerat; nec multò antè,
cognatum Præsidis superstitionum Turcicarum
comprehensum, in vinculis tenuerat. Nostri in
ancipiti periculosam facilitatem, infectam pa-
cem, siue omnia, siue nihil Turcis concederent
reputantes; tamen velut tutius per detrimen-
tum, quàm per bellum pax conficeretur; in op-
pidi vnus iacturam haud grauatè consentie-
bant. Sed vnus metus omnes tenebat, ne
aliena largirentur, Ducisq; in Zbaras, quorum
id oppidum erat, ne sese opponerent vereban-
tur. Postremò à Zolkeuio imperatore, vni ex
primoribus negotium datum, qui Georgio
Duci in Zbaras Incisori tunc Regni, postula-
tionem Turcarum referret. Nam neque vlli
ius in priuata cuiusquam bona erat: & oppor-
tunè tum Georgius cum tribus millibus mili-
tum suorum in castris aderat. Haud dubium
statim Duci videbatur, hâc conditione tentari

patien-

patientiam nostram, & ex vno aliud peti. sed auitæ magnanimitatis memor, & quicquid publicè salutare non esset; priuatim non suum existimans. Ne dii siuerint, respondit, vt per me vestra & Reipublicæ pax distineatur. deferam mox in planum Bersadam. patria illic causâ & cura vacabit. Inter hæc citatim præmissus Piascouius, ac intra viginti quatuor horas, quinquaginta millia passuum emensus, Bersadam aduolat: oppidanos persuasione aduentantis hostis territos, vt in tutiora sese recipiant permouet: ac raptim quibus quisque poterat elatis, noctu vt iussum erat, per idoneos & secreti conscios, ab aliquot locis, oppido faces injici iubet. Tum vbi publica priuataque in igne confedissee certum fuit; subditus Turcisque relatus rumor, quo fortuitum oppidi incendium adsimulabatur. Quare missi à Skinder-Bassâ exploratores, cum ex ignis violentiâ, cineres tantum & vacuum campum remansisse nuntiassent; tandem velut fortuitus euentus controuersiam sustulisset, de pace tractari ceptum. Cæterum populo ex oppido illo exturbato & profugo, alio locus à Ducibus in Zbaras datus, in quo subitis ædificijs exstructis, deducta noua colonia, quæ ab eius loci fluuio Bobroua etiamnum dicitur. Ita vnus Ducis, priuati dispendij contemptoris liberalitate, nec malè inopi multitudini, & egregiè om-

Eius magnanima responsio & destinatio.

Præmittit Piascouium.

Vt oppidum manu sua exurat.

Turce credunt fortuitum haustum.

De pace vltimus tractant.

Bobroua noua colonia populo exturbato deducitur.

*Eodem tem-
pore Tartari
Raskov oppi-
dum Ducum
in Ostrog va-
stant.
Vanè, excu-
sant tamen.*

*Petunt ut Ko-
saci armis pre-
miantur.
Nimirum do-
loso consilio.*

*Quo Kosaci
exacerbati,
Turcarum pro-
vincias acri-
us infestant.*

nium voluntati cōsultum. qui magnus animo, nec minor hoc facto, quàm ex victoria triumpho, æternum magnanimitatis suę exemplar dedit. qui p-
pe seipsum vicit, nec modò patriæ oppidum, sed
& hosti affectum donauit. ne respectu quidē po-
tentia suæ motus, in se potiùs, quos in hostē por-
tauerat, effudit spiritus. Sed faciliùs adhuc à Tur-
cis dissimulabatur bellū, quàm odium. Sub idem
enim tempus, aliam arcem oppidumque nomine
Raskovv, Ducum in Ostrog, ad Tyram situm, su-
bita Tartarorum violentia vastarunt: vana apud
nos excusatione; cum insolentem semper Scytharum
gentem, etiam si summā seueritate regatur, in
rapinas corruptam dicerent. Neq; adhuc duorū
non ignobilium armis bellicoque apparatu oppi-
dorum excidio contenti, Kosacorum tamen iniu-
rias, vt armis persequeremur instabant; callido &
dolofo cōsilio, quos si nostri asperassent; illi pro-
missis à Cæsare premijs libertateq; ad defectionē
deinde in nos vertere, occultis literis, vt postea
innotuit conabantur. Sed Zolkeuius quantum è
Republica peteretur haud ignarus, corripuisse tā-
tū & ostendisse arma satis ratus, vltra nō institit.

Ex eo auctæ Kosacis in Turcas iræ, quas præter-
quam castigatio imperatoris, & vulgata de exci-
dio suo fama, fides etiam propè visi exercitus ac-
cendebat. Inde non portus modò & proxima ma-

ris,

ris, sed interiora vrbesque Turcarum penetrare, premere, excindere: cuncta incendijs, cæde, sanguine complere. quin non multò post suggesti Constantinopolim, Cæsarem venationi intentum trepidumque, fuga intra mania compulerant, accensis circum vicis suburbiisque. quæ omnia tunc forte præsentì, ac velut per ludibrium, super firmanda fœdera misso nostrorum legato, à Turcis è propugnaculis monstrabantur. Ita flagrantior quoque Tartarorum vis. Hic florentissimum Ruffiæ latus, infestis armis tenebatur, vrebatur: illic opulentæ Turcarum prouinciæ & vrbes excisæ soloque æquatae, à Kosacis nostris iniuriis rependebantur.

*Ante vrbes
Constantino-
lis incendunt.*

*Tartari Rus-
siam sepius
populantur.*

Atque cum vetera vtrinque redirent; iterum Zolkeuius postulatus à Turcis arbiter controuersiarum, insigni non militum modò, sed etiam procerum manu, ad Orinimum haud procul Cameneco, statiuam agebat. vbi cum à Tartaris insolenti accursu turbaretur; repulisse propius suggestos contentus, eodem quo antea consiliorum tenore, vt pacem seruaret aut haberet, graui edicto, nè quis abeuntes insequeretur, omnes tenuit. Hinc in eum odia, & multorum suspicio, tanquam corrumpere victoriam; ipso etiam hoste, quoties Russiam popularetur, (bonis eius, nota arte, intactis relictis) suspicione eum maiori onerante. qua ille pressus, antea nec ausus, nec vt in tempore memorabo,

*Alter recupera-
torius con-
uentus ad O-
rinimum.*

*Tartarorum
intoleranda
insolentia.*

*Zolkeuius
iras Polonorum
moderatur.*

Astus hostium

*Rebellium le-
gati Osmani
Cæsarem ad-
uersus Polo-
nos impellunt.*

*Et ipse apertè
fœdus violat.*

*Regressus ad
Gratianum.*

*Gratianus pu-
blicolam in-
ducit.*

ad vltimum satis cunctatus erat. Interea per Bohemiam, Vngariam, & iuxta sitas Prouincias, in suum dominum feruebant bella: commoda Turcis occasione, velut citius, dum alij occuparentur, cum nostris patrari bellum posset. Et rebellium quoq; legati Constantinopoli tunc degentes, propria causa Osmanum Cæsarem stimulabant; haud perinde formidoloso sibi futuro Ferdinando, si nostri per acies distinerentur. Ita intentã iam diu in bellum Cæsaris curam, insuper in iniuriam perpullerunt, vt is repulso ab vrbe cum Regiis literis Otfinouio, ius etiam hostium, sacra legationis, & fas gentium temerarit.

Hic rerum nostrarum status cum Turcis erat, qui Gratiano (ad quem redeo) spem vt nouandis rebus anxiam, ita audenti paratam monstrabat. Sed ne intentatis popularium animis, nostros frustra turbaret, ad concilianda primùm Valachorũ studia conuertitur. & vt erat exercito per mercaturas ingenio, maiori dehinc in omnes beneuolentia agere; comitatem facilitatemq; grata barbaris vsurpare; nobiliores cultiori in honore habere. iamq; cū primoribus secretò, iam palàm apud mobilissimum quemque, ambiguè de Turca differere. quandoq; duritiem imperij, pudendamq; seruitutem exprobrando. alios spe, alios gratia, omnes factionibus impellere; nihilq; turbamenti

quo aut

quo aut ambiguos illiceret, aut promptos firmaret, omittere. vt iam appareret, eum socios & partes querere. Neq; verò fugiebant ista Turcas, qui circumdatâ Gratiano, specie honoris validiori quàm antea suorum manu, apertiore famâ, verba, vultum, tacitum etiam murmur, Constantinopolim, aucta omnia, ac velut in annales excepta trāsmittebant.

Turca id aduertunt.

At ille quantò acriora in se Turcarum odia, & auersam Cæsaris voluntatem tacitis nuntiis perfererat; tantò celerando quod conceperat intētior: offerre Valachiam, apud nostros instare, precipuos quosq; exstimulare: Irent aduersus terrarum ereptores: reciperent suam quondâ prouinciam, æquitate quàm bello, causâ quàm armis. adesse sibi si necesse fuerit, robur equitum, arma, viros, fidem partium; nec defuturas Valachorum cohortes; seq; in omnia promptum, seu ducem, seu exinde militem mallent. Monebat simul necessitatis, vastitatem Podoliæ, Russiæ, notaq; lugubrium cladium nomina sæpius referens: innuebat meliorem esse belli, quàm quietis causam, & vbi suspecta pax, tutius bellum. tum ne vltrâ talia per desidiâ expectent aut patiantur, adhortabatur. Et nostros quidem his & similibus, ad spem repetendæ dominationis erigebat: ipse autem, quamuis Valachorum comparata antea teneret

Gratianus Polonos ad recuperandam Valachiam stimulat.

*Adhuc tamen
anxius.*

studia; subinde tamen aduersa reputans, metu, spe, ratione, interdum fluctuabat. Versabatur enim ante oculos, Turcarum intentum in se odiū & supplicium; fama crebris exploratorum rumoribus in dies facundior; fauor Valachorum nunc promptus, in periculo forte languidus; & fortuna ipsa, prosperis non ampliora promittens, aduersis nihil medium, sed extrema & præcipitia minabatur.

*Valachos in
conscientiam
& rebellio-
nem trahit.*

*Tributa Vala-
chorum sub
Mahomete
II.*

Sub Selymo.

*Nunc quomo-
do exiguntur.*

Tandem, quod in factionibus securius succedere solet, vno crimine vniuersos obstringere, firmioresque ex conscientia reddere parat. Neque id ipsi in arduo fuit, apud gentem pridem ambiguum; tum quoque tributis & iniuriis Turcarum grauius quàm bello conflictantem. Nam initio Mahometes modicum tributū Valachis, duo tantum aureorum millia iusserat: mox auctum in annos, & sexaginta millium, vsq; ad Iuoniam eorum Principem, secutis Cæsaribus numerabatur. Factâ posthac contra eum Selymo Cæsari per Principem Transalpinæ Valachiæ, si Petrus frater dominationis potiretur licitatione, immensum excreuerat; duplicatoq; numero, centū viginti millia aureorum singulis annis arario referebantur. Nunc sublata ista, & quo nihil atrocius, auaritia in crudelitatem versa, quæ iure exigi nō possunt, rapiuntur, non modus, non tempus exactiōibus statum;

statum; sed libido tantū Cæsaris, & Principi quod iubetur dandi necessitas. Vnde miseranda ubiq; rerum facies. dispositi à Principibus exploratores, qui in opes cuiusq; intenti, locupletissimos corripere, fortunis euoluere, rapere, spoliare; non sacro, non profano abstinere, sed cuncta in fiscum cogere, nulla miseratione Principum, vtpote exterorum; & quibus, pro retinenda dominatione, ista est apud Turcas necessitas.

Ergò postquam his recensendis Gratianus Valachos commouerat; audentiùs onerando, vetus etiam transitionis ad nostros consilium perficit. moxque æqua à Polonis semper imperata tributa, veterem amicitiam, rata pacta, constantem fidem, aliaque conciliando assensu opportuna memorando: tandem redintegranda ista suadet. Nec ideò, inquit, quasi minor sibi ad depellendum Turcarum iugum, in Valachorum virtute & armis fiducia; verum posse optata, nullo domestico damno, externo periculo peragi. Nam si Polonorum aduersum Turcam necessitatem, tot Tartarorum incursionibus, seruitia, ingenua, plebes raptim abactas, aliaq; scelera ob pernicitatem inulta æstiment: bellandum quoque illis aut vetera toleranda. at dum Poloni arma sumunt; posse Valachos quietos in prælio, securos in periculo: postremo si pugna placeret, bellatores etiam in acie agere.

*Gratianus
transitionem
ad Polones
suadet.*

Et persuadet.

agere. Interea arma fortunamque in integro tenerent: libertatem alienis potius telis manibusque; quam proprio casu aleamque, tentarent. Visuros breui à Polonis reſerſatam Seruiam, Bulgariam, impuſſasque; Turcarum vires. Iuuabit inde, aut ſecura libertate in otio frui; aut armatos veſtigijs vincenſium inſiſtere. His & talibus alliciebantur Valachi, vt concupiſcerent magis quæ ſuaderentur, quàm quod in rem eſſet cernerent. quippe noſtros ſtatim interiora rectaque in Græciam aduerſus Turcam pergere, exercitum Danubium tranſgreſſurum fingebant credebantque. neque, aliâ falſi veriſque curâ, tanquam cunctari ſeruile, properare audendo regium foret; vulgi more poſt alius alium, quaſi prudẽtiorem ſecuti, obſtricti mutuo fœdere, in conſilium verbaque Principis iurauere: eò audentius, quò plus fidei afferebat falſa Gratiani miſeratio, atque gratior videbatur Princeps ipſe culpæ vel gloriæ author ſociuſque.

*Osmanus in
eum & Polonos
Skinder-
Baſſam mit-
tit.*

Vix paucis diebus, ſilentio preſſam conſpirationem, excepit conſeſtim fama, ſtatimque; Oimano Turcarum Cæſari tulit. is accitum Skinder-Baſſam ire properè, ferreque in Polonos bellum, & Gratianum reſtrictum vinculis ad ſupplicium Conſtantinopolim retrahere iubet. At Skinder-Baſſa, dum colligit copias, aduocat itineri milites comitesque (nam & Gratianus aduerſus pericula
cautus;

cautus; & Valachi fauore Principis imbuti, velut nouo bello aggrediendi videbantur) opportunū Gratiano perlequendarum rerum tempus & occasionem dedit.

Is enim, cum simulatâ in nostros propensione, Tartarorum incursiones ante sæpius nuntiaret; tum quoque velut imminentem apparatus indicio præueniret; continuus incitandis vocandisq; in Valachiam nostris instare. Ecquid adhuc cererent, à Turca sperari semper pacem, haberi nō nisi armis & prælio posse? quanquam quid pacē? cum tot populationibus, continuum bellum, captaque pridem Russia videatur? Hærerent sanè quicti, sequitur tamen necessitas pugnandi quam fugerent. Inde Turcarum consilia, constans & decretum bellum; præfectum exercitus Skinder-Bassam, & alia quibus accomodatiùs, ipse etiam sui anxius, alios terreret aut accenderet, aperit fingitque. Insuper velut ferendo auxilio promptus, viginti quinque millia armatorum, commectum, opes publicas priuatasque, & cætera immodicè vt natura trepidantium promittens, impellere; vt acceptis promptissimis occuparent Valachiam, eunti que occurrerent hosti. hac solâ via Turcam fundi posse; festum itinere, impeditum locis fluminibusque: si ante ignaro superfunderent, quam ille collectum meditatumque ostenderet

*Gratianus id
Pekin nuntiat.*

Auxilia contra eum promittit.

Ut ipsi occurrant suadet.

deret bellum. denique si properant, non vilem aduersum Tartarorum colluuiem victoriam; sed castra Turcica, Valachiam ipsam, pretium laboris, gloriæque peti. at si consultant; si cogitant; tenet Valachiam & dimidium facti Tyrannus.

*Ipsæ in virūg
paratus.*

*Diploma à
Sigismundo
Rege impe-
trat.*

His & pluribus in eundem modum nostros permouendo; ipse interea magna vi auri argenti-
que & pretiosæ supellectilis congesta, diploma à Sigismundo Rege (quo præfectis & procuratori-
bus prouinciarum, liberum quocunque vertisset illi dari effugium mandabatur) impetrat, velut aduersum fortunam prouidus, cæterum præsen-
tibus diffidens, occulta spe fugæ.

*Poloni quoq;
in bellum pa-
rati.*

Dubitant.

Interea crebrioribus in dies Turcici apparatus nuntiis, per Poloniam crescebat fama, cui fidem facesque verba Gratiani, & præteritorum euen-
tus addebant. Nec iam dubitatum de bello; hæ-
sitationem tantum, pergerentne in Valachiam, an in Polonia opperirentur hostem attulit. Qui-
bus enim abduci regno militem displicebat, non ambigua referebant quæ inde sequerentur. Or-
bari patriam fortissimorum virorū præsidio, opes priuatas publicasque deferri, aliò nouissimam re-
gni fortunam transferri; domi metum, pauorem, & in dubia spe, certa belli mala relinqui. atqui ad custodiam regni miles conscribitur, non qui huc illuc traiciatur & bellum quærat. Si communis

*An à patria
propulsandū.*

Mars.

Mars, si promiscua bellorum æstimantur; satis tamen casuum, satis periculorum patriæ superesset, quamvis ea valido firmaretur exercitu. quid, si vasta & patens irrupturis hostibus relinqueretur? An festinamus adhuc cum Valachis vires & amicitiam iungere, ut primo quoque tempore, toties experta ipsorum perfidia, nos inter omnia infesta & hostilia, in acie corripiat? Ita subsidio Valachis, ita obuiam hosti irent, ut & illicitot funerum cladiumque, & hic securitatis publicæ meminissent.

Ad hæc & talia differebatur contra: Multum interesse, in sua quis pugnet terra, an alienam armis metuque teneat. Domi si vincas præmium tibi cruor tantum hostilis, & sæuius rediturum bellum: si vincaris tua patriæque captiuitas imminet. at si in aduersam ditionem te inferas, ruit inde velut soluta compage imperium. quicquid enim mobile, seditiosum, odio vel metu occultum, mox te præsentem ausurum est in bello, quod in pace concupiuerat. inde noua castra, inde ad manum miles, & quæ nunquam speraueras affutura studia & auxilia. Credendum id Turcarum incrementis, qui hoc pacto, ex paruo pudendoque quadringentorum Scytharum secessu, ad eam quæ cernitur surrexere magnitudinem. vna illis pugna Cappadociam, Pontum, Bythiniam, Asiam minorem,

D 2

Pamphi-

*An in hostile
terrum trans-
ferendum.*

Pamphiliam, Ciliciã tradidit. vnus expeditionis impetu, Baiazetes quartus imperator eorum, Macedoniam, Thessaliam, Phocidem, Bœotiam, & quæcunq; ad Bulgaros & Illyricos erant prouinciæ in potestatem redegit. Habet nimirum hoc audacia, vt solo euentu facilia demonstret, quæ segnibus ardua videntur. Ardeat nunc euastetur, quæ vltior Græcia, & castra Polona, Constantinopolis immineant portis: aperiet & recludet bellum, varias quoque in Turcas mentes, quum alios libertas, alios tædium, graui superboque domino hostes, atque euntibus socios dabit. Verum si neque id adsit; iturus hinc est Polonus eques, religione, fide, moribus, amore sibi connexus. quæ verò contra legiones? qui milites? scilicet è Dalmatia & Illyrico, coactæ Ianissariorum rapinæ, Scythæ, Sarraceni, Epirotæ, mixtusq; ex colluione diuersarum gentium exercitus, cui non lingua, non fides, non arma, non causa militandi eadem: ad breuem impetum validus, vbi sustinueris, aduersis dijs in fugam consternatus, vltra neque imperij, neq; armorum memor. Atqui facilius fuerit tales in propriis latebris opprimere, quàm si domi hæreas, variis frustrationibus pugnam eludentes vincere. Denique legiones illic non milites: & vtrinque homines, vtrinque corpora, exæquabit quamuis impares ferrum, vnaque victoria instrumentum sequētis erit, quæ non semper sanguine

guine vel acie, sæpius deditio gentium, quandoque & fama paratur. Proinde in mediam potius Græciam Thraciamve auertendum bellum, quàm in patria per singulos annos immenso sumptu excitandum expectandumque. & miles hostili dehinc solo virtutem exerceat; quàm domi nitidus & quaestuosus militiam per oppida expleat. Neque sanè hoc pacto orbari patriam, quin remotius singulorum periculis hosti viam obstrui. Quid enim profuturum retentum etiam domi exercitum? si vastum nulloque claustrorum interseptum munitum regnum, vix immenso milite custodiri potest? Quarendum tunc quoque bellum esset, & ad inferentem se, vacuis milite locis hostem, huc illuc vertendum agmen. at si in hostile solum infertur miles, simul illuc ista, simul fuga, cædes, cæterasque belli clades à patria transferri: communi equidem vtriusque alea; sed promptiore ijs fortuna, quibus melior in bello causa. Frustra Valachorum inconstantiam obiectari: quasi non alij quoque aduersam nobis aciem struxissent, & tamen quos diu hostes experti sumus, ciues & amicos continua ac incorrupta fide hætenus habemus. Et Valachi, amicitiam, opes suas, potiùs nobiscum habeant, quàm si Turca præualeret, arma aduersùm nos ferant. Irent igitur & quanto Turcis, modestia, bonis artibus, causa armisque

præstarent, tantò promptius Valachorum fidem,
& ex hoste victoriam sperarent.

*Transferen-
dum.*

*Zolkeuius
primoremus.*

Accendebantur his multorū animi, quos Gra-
tianus spe & pollicitationibus fouere suetus, acri-
us impellebat. immotus tantū ad ea Stanislaus
Zolkeuius, supremus exercituum Dux, & Cancel-
larius Regni stetit; non quia diffideret Gratiano,
qui cautos etiam & prouidos permouerat: sed
adhuc inerat seni cauta cunctatio, illudq; vetus:

*Postremo af-
fensit.*

*Konecpolscius
milites colli-
git.*

Omnia prius consilio experiri quàm armis sapiē-
tem decet. At dum alij instare, prælium poscere,
velut rapturi bellum nisi ducerentur; ne quid e-
tiam ad odiū militis, qui periculi dum cupit, quā
moræ patiētor: haud multū deinde cunctatus,
audentiora suadentibus, accessit. Itaq; dum col-
lega Stanislaus Konecpolscius, impiger armis, in-
gensque animi, vexilla signaque, & quicquid mi-
litum erat, destinatum ad locum colligit: ipse in-
terea, filium Ioannem Capitanem Rubieiouien-
sem, iam inde à puero cōtubernio militari assue-
tum, componi itineri & prælio iubet. simul lite-
ras ad Sigismundum Regem, tanquam bellum
approbaret, fatoq; prouidus occurreret, hunc in
modum componit.

*Zolkeuij liti-
re ad Sigif-
mundum Re-
gem.*

Fuisse olim eam mētem Sixto V. Pontifici Ro-
mano, & Philippo II. Hispaniarum Regi, aliisq;
Christianis Principibus; vt Turcarum genus re-
gnorum

gnorum tantum & Christianorum excidijs natū ;
sociatis viribus, in terris ipsorum armis, belloque
premerent : nisi inuida magnis conatibus , mors
Stephani Poloniæ Regis , quæ ei expeditioni Du-
cem , vnanimi consensu destinauerant ; secreta,
necdum adulta quæ Senatui & Poloniæ ordinibus
proponerentur consilia interuertisset. Neq; eti-
amnum aliud domandæ fædissimæ genti se vide-
re vtilius, quàm si noster exercitus, in Prouincias
Turcarum effunderetur. quippe quibus in appe-
tendis alienis regnis summa audacia , in propriis
tutandis par formido adesset. Cæterum cuncta-
tum se hactenus, ne fortiora consilia secutus , atq;
cum parua manu egressus patriâ , velut vno ictu
exercitum absumeret. Iam verò cum Valachi in-
uitent, auxilia promittant, miles consentiat, om-
nes vrgeant , non se vltra detrectare discrimen ;
imo cuicumq; & seipsum & filium vnicum offer-
re. Hoc tantum à Deo votis expetere , vt si ali-
quid sinistri immineat , id suo potius filiiq; san-
guine & vitâ, quàm exercitus, patriæque damno,
pietur. solatium mortuis & præmium fore , si te-
neret Rex vtrorumque memoriam : aut supersti-
tem bello filium fortuna si seruaret, patris vicem
in ipso neu obliuisceretur. Sibi enim iam actam
ætatem, certum & decretum mori : hoc solum se-
ni fesso laboribus, & expeditionibus relinqui; no-
uissimum.

Bari 25 Aug.

uissimum spiritum domi inter contumelias, an in acie per fortitudinem effundat.

*Dein pergit
in castra.*

*Numerus mi-
litum.*

*In Valachiâ
Poloni intrât
3^o 4 Sept.*

*Turce à Va-
lachis cedun-
tur. 5 Sept.*

Talibus firmatus ad castra pergit; vbi datum iussu Konecpolscij viæ signum, & militem in armis inuenit. mox acceptus in medium, signa ferri iubet. Quinque millia militum erant, paru⁹ equidem numerus, sed si concordia adfuisset, cùm virtutis haud peniteret, in ferendo quouis bello sufficiens. sequebantur Kosakorum duo tantùm millia. alij reuoluendo odia, quibus acerbior in coercendis ipsorum, aduersum Turcas excursionibus fuerat; quietem, gloriæ & gratuita militiæ præposuere. Vix penetratum erat ad Tyram, agmenque traijci fluuio captum; confestim non rumor, sed trepidi vndiq; nuntij per Valachiam incedunt: Polonos iam terra potiri, ingentem exercitum rapi agique. quæ cuncta sperata Gratiano, subdita adhuc ab ipso atrociori famâ; quò in cædem Turcarum se obseruantium, Valachos metu vel merito Polonorum promptius impelleret, in maius attolebantur. Tum verò audentibus paucis, non populus modò, & parata alienæ audaciæ plebs: sed equitum & nobilium pleriq; posito metu incauti; tanquam deinde per flagitium apud nostros, fauori præmioque propiores, in cædem Turcarum ruunt, ignaros trucidant. sanguis, mors, vulnera passim: nec vlli moderatio

tio aut finis; sed permissâ vulgo licentiâ, donec inuisa gens & facietas permansit. Pauci tantum Turcarum, quos fuga fortunaue subtraxerat elapsi; per longinqua & auia, integri, pars vulnerati, Skinder-Baidæ iam Valachiæ appropinquantî occurrerunt: simul Gratiani conspirationem, Valachorum defectionem, nostrorum irruptionem, vera falsaq; in modum metus & periculi attollentes, retulerunt.

*Qui clapsi
Skinder-Baidæ
se occurrunt
& omnia nũ-
tiant.*

Peruenerat quoq; ad castra Polonorum de cæde Turcarum fama, quæ adeò militem mutauit, vt quasi debellatum fuisset, contemptius inde vagari, prædam velut in hostili solo exercere, atque disciplinam, quam vtcunque hætenus Turcarum timor, & Valachorum suspecta continebat fides, remittere inciperet. Vnde alius & Valachis animus, cognita insuper paucitate: non tamen propensio in Turcam, sed odium in vtrosque par; ex Túrca si præualeret etiam metus. Verùm nondû spretâ virtute nostrorum, neutri parti adhærédo, opperiri futura, atq; ex euentu bellantium, abnuere aut agnoscere fortunam, faciliore apud victores, excusatione aut veniâ, decreuerunt. Gratianus quoque, qui incertum omiserat an distulerat contrahere promissas copias, vbi minorem spe exercitum aduenisse, certiori nuntio accepit: vitatis nostrorum castris, recta Chocimum conterminâ

*Poloni audita
cæde Turcarum
securi.*

*Valachi qui-
bus adhære-
ant, hærent.*

*Gratianus su-
gam medita-
tur.*

*Sed eam im-
pedit Zolke-
uius.*

*Gratianus ve-
nit in castra
Polonorum
7 Septembr.*

*Cognoscuntur
sed premun-
tur à Duci-
bus Gratiani
artes.*

*Gratianus be-
nigne habe-
tur.*

*Conuiuio ex-
cipitur.*

Russiae arcem flexit. nec iam de imperio sed de salute sollicitus, quomodo per Pokuce, prouinciam nostram fugam in Germaniam euaderet, circumspectabat. Sed occupauit Zolkuius ea consilia, inuitatum enim per literas, ubi necesse moras; necdum collectum militem, & saepius incerta vanaq; respondere didicisset: id forte quod meditabatur suspicatus, ut veniret in castra leucrioribus literis admonet. quibus ille territus, certo si abnuisset exitio, ultra nec fugiendi nec manendi potens, consilium cui impar erat, fato permittit. Itaq; non multo post, paucis suorum comitatus in castra venit: auertenda iurpitione, letitiam & gratulationem vultu ferens; animo anxius, & deteriora metuens.

Suspectabantur iam inde à Ducibus Gratiani & Valachorum artes; pars tamen sanitatis erat illas premere, ne deprehensa à milite, quem confidentia, & spes donatiui à Gratiano, promptiorem ad officia dabat; turpem in castris ante praedium trepidationem concirent. Igitur Duces metum & noxam conscientiae Gratiano pro pena factis esse rati: tum eo in castris habito, Valachos ad se inclinatuos sperantes, in simulationem compositi, omnia honorifica ut in Principem usurpant. adhuc ipsum & comites donis deuinciunt, adiectoque conuiuio per epulas & vinolentiam consilia,

lia, copias, animum hostium ab eo expiscantur. Sed non ideo incautus Gratianus, cuncta recondere, numerum extenuare, septem, nouem, octo millia Turcarum adesse, dicere, negare. Id plerisque nostrorum suspicioni, pluribus audaciæ fuit. nec deerant qui Ducibus instarent, vt versus Tschiniam & Belgradū (quod antea destinauerant) indeq; in Tartarorum sedes bellum ferrent. Sed Duces metu pauci exercitus, simulq; Valachos alio victoriae pretio in deditiōem pertrahere volentes, gloriam potius retinendæ Valachiæ præposuerunt. Itaq; ire inde versus oppidum Cetorā, camposq; & locum, quem olim Ioannes Zamoscius infederat, occupare ipsis visum.

Ille nihilominus cautus numerum hostium extenuat.

Duces metuant consiliū de sede belli.

Aggregabantur interea ad Skinder-Bassiam, magnæ Turcarum & auxiliariorū copiar. aderat Galga Chami frater, & Kantimir cum ingenti Tartarorum exercitu. quin aliquot primores Valachiæ, ad Turcas profugi, exemplo, reliquos in deditiōem & auxilium belli pertraxerunt. At Gratianus in castris nostrorum iter & tædium ducens, non iam Princeps aut auxiliarius, sed belli tantū causa: incertum, spe adhuc, an quia proditis quoquo modo nostris, tutiorem fugam vel meritum apud Turcam putaret; militem ad prælium & festinatos casus continuo impellebat. Facile, inquiens, oppressuros Skinder-Bassiam, si improuisi longin-

Galga, Kantimir cum exercitu Tartarorum veniunt.

Valachi ad Turcas transfugunt.

Gratianus tamen turbat.

quitate itineris fessum, sine Scythis inualidū, excursionē valida adorirentur: nam & fortes subitis terreri, & audaces à fortuna iuuari sæpius expertum. Acceptumq; vulnus nimia fiducia fuisset; nisi Duces prudentes, militem sub imperio & vexillis tenuissent.

*Figitur bell
sedes ad Ce-
sorum oppidū
12 Septemb.*

*Ibidem castra
metantur.*

*Odrziuolscius
speculatum
missis con-
silia hostium
cum hostibus
v. l. l.*

Ventum deinde Cetforam, missusq; cum expedita manu Odrziuolscius, speculatum consilia, animum, itinera, copiasq; hostium iuit. alij ad expediendos commeatus, cæteraq; quæ in rem videbantur dimissi. Zolkeuius verò ingressus dimensa olim à Zamoscio castrorum vestigia; sed diruto vallo, & humili fossa, reliquas legiones reparare iubet. Mirum, quàm fides Gratiani, & quia nulla euntibus apparere arma, securū ideoque lentum ad obsequia dabat militem. Quid enim aiebat sibi à Ducibus decerni? nimirum ut nomine militiæ, cumulos terræ & fossorum operas accipiat. Propria militum arma manusque faminis tantum & imbelli vulgo fossæ & vallum salus. quibus nunc cum hostis deest, abditos se aduersum campos tenere Duces parant. Ast vbi ingenti tumultu, Odrziuolscium & hostes aduolare, aspectus fama; eadem tulit: tum verò intendere operas, circumagere corpora: & ut trepidis rebus contingit, alter alteri præcipiendo, suamq; ignauiam obiectando; aduersis imperium desiderabant,

derabant, quod prosperis datum non intelligebant. Deductum tamen postea opus minori trepidatione: quia nec barbari, turbare munitiones ausi; & quanquam vicino hoste, multitudinem tamen armorum, propinqui colles, arbustaq; occultabant. Signum deinde frumentatoribus tormento ut redirent datum. pars regressi: plures onusti præda, aut palantes per agros, in manus hostium circumuenti venerunt. Iam quoque flexus erat ad vesperam dies: nec hostis tunc certamen ausus, militem quiete, velut timoris indicio, ad futurum prælium acuebat, redibatq; remissa hac tenus virtus nocturna meditatione belli.

Illo die abstinetur viringis à prælio.

Orto die Turcæ & Tartari, quò discreti manifestius spectarentur; sibi quæq; gens separatim, per turmas & vexilla compositi, steterê. Illorum, octo millia, ad dextram, edito montis, qui Cetso-
ræ superiminet: horum triginta millia, supercilio haud procul distantis tumuli, qui Delidolinæ (sic loco à profunda valle dicto) adiacet. Secunda
fermè hora diei, ferocissimi cuiusque nostrorum prokursu, prospero euentu crebræ velitationes, in longum diei productæ: iamq; ex fortuna & ira ardescendentibus animis, infecta etiam nostrorum signa in apertum effundebantur. Sed hostes haud
fidentes suorum virtuti, frontem & latera relinquunt. inde circumgressi ad ripam Pruti, tota vi,
in levis armaturæ militem, munitionibus cauro-

Hostes compositi per vexilla constitunt 18 Sept.

Velitationes.

Tartari in Velites incur-

*Dinophius cū
suis erumpit,
& pugnam
restituit.*

*Velites pol-
lunt Tarta-
ros.*

*Tartari re-
trocedunt.*

*Eorum con-
suetudo in
pugna.*

*Zolkeuius re-
ceptui canere
iubet.*

*Poloni fero-
ces.*

rum adiacentem, cui Valentinus Rogascius Mo-
schouitica expeditione, iuxta ac paulo ante fa-
cta in rebellem Vngariam irruptione, victoriāq;
clarus præerat, incurrunt. Turbabanturq; densis
Tartarorum cateruis leues cohortes, ni Dinophi-
us bello strenuus, manuq; promptus, cum aliquot
tūrmis equitum, citato aduectus equo, rem pro-
pè inclinatam restituisset. Tum verò accensi me-
liore successū Velites, ne aut accepisse aut deside-
rassè auxilium viderentur, valido impetu conni-
xi, quantò ferocius accurrerunt, tantò acrius in-
fugā pullos barbaros disijciunt cæduntq;e. Iam-
que haud procul iusto prælio res fuisset; ni hostis
nudato campo, exercitum in colles pristinos pro-
perè subduxisset. Id signum percussū fuit, an ada-
stūm conuersi, incertum. Nam cum apud Tarta-
ros, cedere consilij potiùs quàm formidinis sit, ita
dehinc cautè pugnatum, vt nullus audentius in
nostros effusus, capi vel cædi potuerit: sed velut si-
mulato pauore, quò nostros fuga inescatos, & lon-
gius euectos dolo circūuenire animus esset, refu-
gere videbantur. Sensit ludibrium & astum
Zolkeuius, signoq; receptui dato, ardorē & fortu-
nam militis repressit. nec ille vltra institit, cui se-
quēdi desiderium nox etiā & lassitudo ademerat.
Irritatus tantū Polonus reducit in castra,
ac prosperis ferox, optando diem aduersus elu-
dentes

dentes hostes, ultionem fremitu & iracundia explebat. mox velut ingrata veniret nox, quæ in posterum diem dubiam certaminis expectationem faceret, circumfistit Duces & Centuriones, oratq; Ne pugnam differendo, abditos ultra in vallo more faminarum tenerent. non enim fossam aut vallum sibi, sed corpora & arma in hostem data. neq; se in spectaculum fugientis hostis, sed in bellum assumptos. Itaque aut certamen sibi Duces, aut si quies placeret, emensis tot itineribus, maturum otium concedant. Et verò promebat Duces, præter militum preces necessitas in loco, ubi nec sperare vltam opem poterant, & si diutius morarentur, annonæ propè inopia instabat. Sed quanquã magis suorum animis, quam viribus fiderent; non ignari tamen, primis ausis, hosti metum aut fiduciam gigni: statuunt ostendere aciem, & dato die prælium incipere. Atque cum deliberabundi de crastino prælio, capita conferunt; fortè interce-

ptus à vigilibus vagus è Tartaris adducitur: cuius indicio cætum millia hostium adesse cognoscitur. Differre inde summam certaminis Duces Centurionesque parabant: sed miles impatiens moræ, quaterere arma, nolle requiem, optare lucem. Videret tantum aduersos, ac si ab imperatoribus non daretur, se ipsum occupaturum tempus & occasionem pugnae minaciter strepebat.

Adeo
tunc

Summam certaminis in crastinum depojunt.

Nec Duces abnuunt.

*Cognoscitur à Tartaro capto
uo adesse hostium 100000.*

*Sed non cre-
ditur.*

tunc aut hostem contempserant; aut quod tantis velut referebatur copijs, suorum non restaurasset fugam, illius tantum numerum adesse haud credebant. Ergo & Duces, ne aduersa militi cunctatio, audaciam quam in victoriam fouisse par erat, eximeret: relicto valido à tergo castrorum, quâ fluuiio diffidebatur præsidio; postero die auidos certaminis in apertum hoc ordine producant.

*Instruitur Po-
lonorum a-
cies 19 Sept.*

Vna & altera carrago, quas lixæ agerent, ex cētum circiter vehiculis conficitur. vtriq; à tergo, fronte, & lateribus quatuor tormenta, insuper aliquot bombardarum sarraca adduntur. Tum sic instructæ, facto pediti spatio, quo inter vehicula & tormenta commodè reciperetur; amplexibus castrorum portis simul emittuntur. addito præcepto, vt pariter præcedentes, eatenus ex æquo progredierentur: quoad relictus in medio campus, succedentes sibi legiones, totumq; exercitum reciperet. Sed incalūm imperia data. nam cum Ducum alter, graui senectæ vix omnia per se interuifere posset: alter vt ordo agminis in aciem adisteret, emittendis cohortibus attenderet: aut plurium securitas vel audacia obsequium eximeret, sinistra carrago haud procul vallo substitit. dextra quoad manipuli explicabātur vltra quam satis progrediens, frontem propriumq; latus latè & longè nudauit. Adeo vt & vis tormentorum, quæ

quæ ideo pro castris & carraginibus ad se versus directa erant, vt quacunq; intrantem exciperent hostem, distantia languesceret: & quæ quadrata acies stare debuerat, laxatis ordinibus, dextrum cornu in enormem inutilemq; mucronem porri- geret. Vbi sic legionum agmina stetere fulgen- tibus aquilis armisque; Turcæ quoque & Tar- tari, à suis Ducibus, vt nouo semper & coniuncto orbe, frontem lateraq; incurfantes, pari vi & ve- locitate nostras acies rumperent, simulq; recurre- rent, in densos cuneos compositi emittuntur. Atque qua frontem dextrumq; latus infirma con- spexerant, illic truci actû primum quod nunquã credebatur, immensoque agmine incumbunt.

*Nec hostes de-
treclant pu-
gnam.*

Excipiunt hanc nostri intrepide barbarorum vim, primoque impetu aduersos impellunt tru- duntque. atrox inde Tartarorum cædes, nec mi- nor tormentorum fulmine à Theophilo Sem- bergio è dextro maximè cornu in temere effusos edita strages. passim corpora & laceri artus, e- quorum virorumque cumuli, vt propè difficilior tum hostibus, per suorum cadauera; quàm dein- de per nostrorum legiones fieret transitus. Sed ea nostris non diu durauit fortuna; mox enim ab ex- tremo laterum, vnde tormentorum globis obrue- bantur amoti hostes, in media patienti & innoxio campo irrumpunt. Tunc verò plurimus vtrinq;

*Theoph: Sem-
bergius.*

F

labor:

Zolkeuij duo.

*Wrzescius,
Goslicius,
Koualkouius,
Dinophius.*

Dux Korecius

labor: barbarus densis cuneis hac illac impetit; stat contra obnixus Polonus, & quanquam accipit maiorem infert cladem. cedit ille moxque recenti globo remeat; sternit hic, ac transuersum aut obuium quacunque datur prouit: donec deficientibus laesitudine viribus contumaci animo resisteret magis quam pugnaret. Tum inter primores duo Zolkeuij cum propè cedentem viderent aciem; infestis hastis in confertos prouolant, totumque secum dextrum mouent latus. sed audentius illati iuuenes, obruti ibidem telis, haud inglorij equis defluxêre. Neque segnius fronte arma gradumque miles retinebat, verum laxatis semel ordinibus, haud multum ibi quoque prodesse virtus: fors cuncta miscere, & strenuissimi quique dum acrius pugnam cient Wrzescius, Goslicius, Koualkouius, primipilarij cadunt. Inter quos Dinophius deletâ pene sibi cohorte, cum aliquot tamen militum, voce, manu, vulnere, sustentabat pugnam. Pulchrum quoque erat in sinistro latere Ducem Korecium videre, haud ita multum Constantinopoli captiuitate elapsum, per Turcarum centuriones circumferentem truces vtricesque oculos: nuncque singulos prouocantem, nunc increpantem omnes. deinde cum sustinere iram non posset (hostes enim illic nostros confertos tutosque loco suggredi propius non audebant) obuersis

sis cominus armis acriter prouolantem: cum quo duos quoq; eodē latere Chmielecium & Ferenbachium virtus pariter exemplumq; in hostes agebat. Ita prælium grauius & atrocius vbique crescebat, non enim solum centuriones Nicola⁹ Strusius Capitaneus Haliciensis, Martinus Kazanoui⁹, Alexander Balabanus Capitaneus Vinnicensis, Ioānes Tyskeuici⁹ & alij ad regendā consilio rem affuere; sed suismet ipsi corporibus dimicantes, miscuere certamina: nec quisquam postea procerum hāc aut illā acie incruentus excessit. Quin & Konecpolscium totā volitantē acie, fortuna magis deserebat, quā virtus. sensit solum agmen; accurrit: retrahere carraginem dextram nititur; sed frustra: formidine dilapsis aut abditis calonibus. neque etiam confusa huc illuc vehicula, amplius explicari, aut abiunctis equis moueri loco potuerunt. Ille tamen constantis Ducis aut fortissimi militis officium non deserre, accurrere, adire, hortari; auxilio, exemplo, laude. Post vbi dextro cornu vexillarium circūuentum à globo hostium videt; velox inter tela se immergit, duobusq; manu obtruncatis signiferum & aquilam seruat. Prælium deinde varium, anceps; his, rursū illis exitiabile: nunc vt cuiq; virtus aut audacia prorumpere vel reuchi: nunc sine cura regentium, alter alteri opem ferre vel

*Chmielecium,
Ferenbachius*

*Strusius,
Kazanoui⁹,
Balabanus,
Tyskeuici⁹.*

Konecpolscius

*Prælium va-
rium.*

accipere: non sanguinem non vulnera morari: quoad deficiente die & viribus, obscuro iam noctis, fessi castra repeterent. Producebat tantum in dextro cornu praelium desertus pedes, quem difficili effugio implicitum, vehicula tormentaque tenebant. sed nec ipse spe aut viribus par diu vim tenuit. multi illic capti unaque caesi: ceteri vano impetu, quacunque exitum ostenderat spes sese eicientes, a tenente circum omnia hoste interiêre.

Almadi.

Vnus Almadi Vngarus, praefectus peditum, cum viginti & aliquot insuper suorum, duplici vulnere laucius, cunco viam ad castra fecit. Tardè post eum Sembergius, diu aduersos iaculatus, dein ab omnibus desolatus, per bella tamen & aduersa multum exercitus, eoque tunc etiam interritus & in periculo sapiens, solus, immixtus ignarusque hostibus, audaciâ & errore euasit. Cæsa eo die hostium tria millia & quingenti: maior numerus vulnerati. Nostrorum trecenti quinquaginta desiderati. duo tormenta tempestiuè subducta, reliqua quæ erant cum dextra carragine, & ipsa carrago amissa. Stetissetque haud dubiè sine sanguine & damno nostrorum victoria; nisi quæ communis est militum querela, carraginum adfuisset audacia vel temeritas.

*Numerus ca-
sorum.*

*Novum ma-
lum.*

Sedato praelio grauis receptos intra castra milites timor incessit: nullo nouo periculo, nisi quod

quòd peruigilium & tenebræ, diurnam difficultatem in metum & curam trahebant. Fatebantur enim, nunquam pertinatioe pugnâ cum Tartaris conflictum fuisse, & ni eosdem retrò nox & fortuna egisset, versatam in discrimine summam rerum; à quo etiamnum haud procul abesse, vndiq; clausos, nullo patriæ subsidio. Vnde enim posthâc pabulum equis, alimonia militi, aut alia quæ ex otio aut necessitate castrorum parantur? Nempe obsessis ac velut captis, superesse tantum mortem ac æternam obliuionem, quam immensa illa Tartarorum vis aut fames adiiceret. Recurrebat præterea infaustus in Valachiam ingressus, quem effusus tunc in profluentem Nestrû, nitratus pulvis, & cum moueretur agmen, nulla violentiâ, signum imperatoris fractum, portenderat. pluraq; alia, quæ securitate neglecta; timore, vt Dei ira, vt omina, vt fata resumebantur. Inde non metus iam per castra, sed pavor & infelicitis belli execratio: cui extracta quomodocunque nocte, nouum dies & Gratianus flagitium addit. Cùm enim ipse diffidentia præsentium vereretur, ne traditus Skinner-Bassæ, supplicio suo, metum simulq; belli cōtrouerſiam componeret: remedium periculorû ipsa pericula ratus, eò acriùs inferere se trepidantibus, vrgere metum, aggregare pericula, suadere fugam, ostendere viam; quam si se duce & co-

*Omnia visa
intrando in
Valachiam.*

Gratiani secus.

mite capefferent, immunes à periculo, breui aut recto itinere per Pokuce; aut obliquo per Transylvaniam penatibus suis redderentur. Alliciebantur his faciles per metum quorundam animi, nec vitæ postea nec gloriæ compotes, incedenteque pestifera per caltra lue, cupidissimi quique in scelus aggregabantur; cæca spe vitæ, nulla pudoris cura, ignaris Ducibus centurionibusque.

Gratianus fugit.

Iamq; nox teterrimo facinori opportuna aderat, & Gratianus ad prætersuientem amnem præcurrens, primus viam fugæ exemplumque dedit. Fluvius is ponè terga castrorum decurrebat, quodam Hierassus, nunc Prutus dictus: altero littore tenuis, sylva Fagetulana, accolis Bukouina dicta, quod eius arboris frequens sæcundaque sit, imminabat. Illuc ergo Gratianum secuti qua cuique proximum sese proripiunt, lugubri spectaculo & obuia pæna; dum alij vadorum ignari præalto & subdolo amne haurirentur: alios densi raperent traherentque vortices: aut si qui in alteram partem elati; statim à Scythis & Valachis, in sylva ipsisq; latebris trucidarentur. Duces cum Centurionibus egressi, cum frustra reuocare fugientes, nec imperio, neq; autoritate, ne precibus quidem & manu valuisent; amnis, hostium sæuitia, & proprium cuique periculum, quò minus maior pars effunderetur obstitit. Gratianus equo in alteram

Bukouina sylva.

Gratiani exitus.

teram ripam elatus, exitium quod euaserat, ad breue tempus latebra distulit. exceptus enim misericordia vnus Valachi, eiusq; tugurio abditus; claritudine infausti principatus, spe premij & perfidia eiusdem Valachi trucidatur. Sed Alexander Princeps deinde Valachia, caput eius sibi delatum, non premio, sed simili in proditorem ultione pensauit; solito Principibus metu, & ad futura munimento, ne quis simili facinore, paratum ex diuerso apud alium, præmium etiam ex se speraret aut peteret.

Interea calones, lixæ, & qui fortunam vbicunque inueniunt amant, dum vigilias, stationes, castra etiam relicta vident, irrumpunt contubernia: sarcinasque militum, tabernacula Ducû, & quicquid vsipiam spem inuitaret scrutati, omnia vt prædam, aut spolia inter se rapiunt. direptis potioribus, residuo faces iniiciunt; desperato fortasse aliorum reditu: aut populatione velut fortuita ignis, raptus velamen habituri. Neq; enim ullus obuius, aut moderator licentiæ aderat; pars comitatu, vel simili officio cum imperatoribus occupati: pars fuga, aut timore dilapsi. atq; tunc primum ad ferendam opem confluebant; cum magnam iam castrorum partem flamma aderam, & ni extinguendo anteirent velocitatem mali, haurire cuncta incendium cernerent.

Castra accenduntur & diripiuntur.

Redierunt:

Historia rerum

Redierunt tandem in castra, multi inuiti, plu-
res nocētes. quo cum intrassent, miserabilis com-
militonum memoria, præsensq; castrorum defor-
mitas, adeò pauentes confuderat; vt etiam à Cē-
turionibus impulsī, non progredi loco possent,
non tutari vallum, non animo, non lingua, non
auribus competere. Victorum tantum aut capti-
uorum habitu, defixo in ruinas & busta vultu sta-
bant; lugubri per omnia prospectu, velut reorū
agmen, & funebres exequiæ. Ipse Dux calami-
tosa senecta, ante lacerum & semiustum tentori-
um, raptus, defectionem, quid castra? quid ipse,
quem deseruerant deplorando, nocentiores fa-
ciebat: eò impensius, quod ne tum quidem vecor
des conscientia, odium in Duces & Centuriones
ponerent; familiari militum consuetudine, cul-
pam quā deliquerant, cum inuidia rerum recto-
ribus imputando. Fecerantq; vt & Duces time-
rent contumaciam eorum, hætenus incerti, pe-
riculosiorne foret seueritas an clementia; infectis
pluribus, quasi valetudine & contactu. neque ta-
men vllus in iudicium vocatus; dissimulantibus
integris, parata fortasse apud nocentes aut con-
scios peruicacia. Atq; nisi viteri⁹ Duces & Cēturi-
ones salubri cū Skinder-Bassa tractationū simula-
tione, confusionē illā exemissent, simulq; hostiū
vim cohibuissent, haud procul iā ab exitio aberāt.

Quan-

*Prudentia
Ducum.*

Quanquam & tunc, Deus ipse, fortunaq; gentis ipsos tutata est, quæ Turcis Tartarisq; aliam potiùs mentem, quàm hostium dedit. Adeo dum varijs frustrationibus per octiduum eluderentur, nulla spes, non potiundi modo, sed ne adeundi quidem castra Polona animos illorum caput: sed forte confusio ipsa procul visa, flammaq; piacularis castrorum, terruit tenuitque volentes, ut in vasto & deserto campo, inter tabem pecorum hominumq; desides tempus tererent: donec fidente paulatim metu, quàm Ducum, quàm centurionum, aut quicquid castrorum sincerum erat, cura; obsequium etiam nostris, & parenti amor, quod solum ipsis defuit, cum virtutem non argueres, pararetur. Tum ergò ubi iam æqualius & reuerentius regi poterant, iactata sæpius per centuriones irritis nominibus spe pacis, imperator concionem classico aduocari iubet. quæ ubi frequens aduenit, ipse cum dignitate alia corporis, tum senecta maiestatem præferens, filio, primoribusq; prosequentibus processit. Mouit milites præsentia viri, memoriaq; fortunæ & virtutis eius, cumq; sermonem exspectarent, diu quoque Dux tacitus stetit: haud perinde iudicio vel seueritate; sed dolore victum apparebat loqui non posse. postea quasi à luctu requiescet, collecto animo ita orsus est.

Historia rerum

Si eam quam ex obsequio & virtute exercitus mei gloriam capiebam, incorruptam quandoque à me retineri dijs cordi non eîet, maturam ante & sine noxa mortem mihi oxoptabam. tunc enim vitæ socia, & mortis comes eadem gloria fuisset. Nunc verò eò me longa vita, & infelix senectâ traxit, vt tot malorum exercitui meo conscius, vix morti honestæ locum reperiam. Satis, satis, ne hucvîq; durassem honorum mihi, nimium vitæ fuit, mori me pridem, aut si segnis mors erat deponere hoc imperium oportuit. Neque enim vbi fuerim scio. an apud milites meos? quibus proiecta ducum auctoritas, desertus hostibus imperator. an in castris? quæ lacera, deusta, speciem nunc horrendæ vastitatis habent. Atq; ego procul iam ista amoueo, neque in vos facinus vulgatum volo. Illorum sanè is furor & amentia sit, quos à contactu vestro vltor segregauit pûniuitque Deus: vt tamen illorum tantum sit, à vestra virtute expectatur; sine qua nec dolor inuidiaq; ab imperatore vestro, nec à vobis alienæ culpæ suspicio aberit. Equidem meminimus, fatemur; pugnaistis strenuè; soli in acie, soli in castris mansistis. hæc tamen quæ nobis palâm, cæteris in occulto sunt, & nisi eadem nouo decore, ferro per confertos hinc egrediendo hostes demonstratis, quis credet, aut ignoscet? Videtis non aliud nisi

fame

fame & siti pereundum sit, quàm vt hinc abeat
relinqui. Absoluite igitur necessitate virtutē ve-
strā, atq; istud adhuc adijcite, facite eos qui vos
deseruerunt, victoria vel morte nocentiores. Non
hoc refero tanquam perituris, sed etiam si caden-
dum esset, ideo vobis acies, ideo tela, ideo ho-
stes datos putarem. Nunc cum vos considero,
cum facta vestra æstimo, non mortem, sed pul-
chram & spectabilem victoriam à vobis expecto.
Nam ne ignoretis cum quibus hostibus vobis res
futura sit, vestra decora recensete, vestros oculos
interrogate. Ij sunt de quibus viginti & quinque
retrò ab hinc annis, duce Zamoscio, memorabile
decus domos ad coniuges & parentes vestros re-
tulistis: ij quorum cineres ossaq; hoc ipso in lo-
co deuicta calcatis. Et iste vos circumstans igna-
uorum est ac metuentium numerus, quem per
hos dies desidem, ne castra adoriretur, ne malis
vestris exitium adijceret, timor propriaq; despe-
ratio tenuit. Sed quid ego hæc recensco? non
tantum milites decus de hoc exercitu, toties vi-
cto, casu, fugato: quantum gloria seruandæ à vo-
bis patriæ æstimanda est. Quæ enim alia sunt do-
mi nisi vos vincitis castra? quis alius exercitus?
pro patria, pro ciuibus, pro coniugibus & liberis
vestris vobis decertandum est, & nisi perrumpi-
tis hostem, iam intra patriam erit, per vrbes, per

provincias vestras ferro & igne grassabitur. Ostendite ergo Regi & patriæ quales vos sibi milites seposuit, quibus acies, arma, incolumitatem propriam commisit. non enim relictæ hic estis, sed electi ut vincatis. En ego imperator vester clara voce in prælium voco. En si aut hauriendus aut dandus est sanguis, primus caput hoc in omnem aleam lubens deuoueo. Vobis si idem est animi, mecum quoque arma & manus expediendo, approbate nunquam vobis aut in victoriam, aut si perire etiam necesse fuit, animos in mortem deduisse. Hoc me tantum dolore inuidiaque: hoc vos quicquid hætenus ausum temeratumve aliena culpa absoluerit. Constantia orationis, & quia experta difficultas spem omnem inciderat, terruit simul audientes & accendit. nihilque (ut postea fatebantur) adeo confirmauit, quam vultus imperatoris impavidus, voxque nulli periculo cedens; ut appareret multum in illo senili pectore, non consilij modo sed etiam virtutis virere. quod ille nequaquam sefellit, sublatoque à concione clamore, ut in hostes duceret, facile postea demonstrauit, validiorem Duce & obsequio, quam numero & ferocia rem ipsorum esse.

Milites resumunt animos.

*Poloni itineri
& prælio com-
ponuntur 29
Septembr.*

Igitur ubi satis animos militum explorauit, iij Kalendas Octobris vniuersum exercitum vallo munitionibusque educit. Fronte & tergo tormenta,

menta, medio currus vehiculaq; septem ordinibus incesſerunt. hæc antepositus proprijs signis eingeſbat miles. introrſum impedimenta & equi recepti: quippe ſolum tunc in pedite robur, quia procurrere reuehiq; non ſanè tutum, ne diſtraheretur paucitas. Poſtea optimus quiſq; ad periculoſiora loca conſtitutus. Korecio & Ferensbachio ordo primi; Kaſanouio medijs agminis cõmittitur, homini militari, & qui amplius triginta annis, aut miles aut centurio in caſtris fuerat, eoſq; ipſos milites, & fortia facta eorum nouerat, ſubindeq; memorando animos illorum accendebat. Sembergio tormenta & extremum agmen permiſſum. His ergo ita prouiſis paratiſq; , flexo iam ad veſperam die, exercitum Zolkeuius ſignaſq; itineri mouit. Hoſtes quoq; per aliquot dies nequicquam deſides, & tractationibus tantùm deluſi, cum præter opinionem armatos ac velut auctos viribus abire cernerent; repente circumfuſo toto virorum equorumq; agmine, quacunq; eunt perſequi, laceſſere ad pugnam: primo obequitando prouocandoq; , deinde per occaſionem huc illuc irruendo: poſtremo irritò vndique conatu, diuiſis inter ſe copijs, pars infeſtando agmini relictæ, pars prægreſſæ, qua mediâ nocte per fluuium noſtris eundum erat, tranſitum occupauerunt. Et turbabantur primo impetu,

*Ab hoſtibus
tota nocte fru-
ſtra infeſtan-
tur.*

fluitantes labantesq; lubrico nostrorum ordines;
mox tamen totis corporibus connixi, ruperunt
continuaueruntque viam.

*Luce prima
metamur ca-
stra 30 Sept.*

*Iter ingredi-
amur.*

Sub ortum solis constituta signa, simulq; cæ-
ptus dies truci clamore, horrendoque barbarorū
iono, qui pertinaciter contra circaq; ingruendo
obruere ac obterere paucitatem nitebantur. Sed
cum obsequio & reuerentia Ducum, non fortuna
iam magis, quàm virtus pro nostris stabat, pulsūq;
ingenti tumultu hostes, tempus etiam transferen-
di castra tutiorem in locum dederunt. Cæptum
iterum primis tenebris iter, vt aliàs inquires, tur-
bulentum; nam præterquam quod continuò sub
armis enitentem exercitum paludes montesque
fatigabant: crebra quoq; prælia, prouisa, subita,
per saltus, per sylvas, sæpius in modum latrocinij,
nec milites, nec centuriones, nec Duces remitte-
re laborem permittebant. Neq; hæc tantum, sed
etiam omnium incertos, nocturna ignoratio,
ictus, sonitus, bellantium, accurrentium, euntiū,
à tergo, à fronte reperlussæ voces huc illuc distra-
hebant turbidis clamoribus. Et cum eadē conti-
nuò accideret, tamē velut assueti malis obstinato
ad mortem aut victoriam animo, constanti gradu
ad lucem prosequiebantur iter & prælium.

*Skinder Bassa
nequoquam
oppugnat ca-
stra 1 Octobris.*

Prima hora diei, profundam vallem intranti-
bus, vix spatium consistendi dato quietem rursū
exemit

exemit Skinder-Bassa ; sperans enim illic ingenti suorum agmine, ac pulsu sonituque velut nube operire ac superfundere fessos, omni ex parte illos aggreditur. Sed nihil & ipsi territi, in orbem se colligere : ad omnes partes pugnam intendere : donec fortiter superato impetu, mox etiam ingenti strage subeuntes pellerent funderentque. Tunc vero nequicquam & cum damno tentata aliquoties oppugnatione, cum vis negligeretur, differendam, potiorēque dolum Skinder-Bassa ratus, ficta modestia ad Ducēs mittit. Posse, inquiens, de reditu ipsorum conditionibus transigi, nec committēdum vtrinq̃, ut tantum egrēgiæ pubis fortissimorumque militum, nullo sane pretio sternetur. Non enim internecium cum Polonis geri bellum, & satis quoque sibi gloriæ partum, si temere occupatam redderet Casari Valachiam ; & ipsis abundē accersurum, si nondum victi, oblata ab ipso hoste pace, belli ambigua, nec sibi ex omni parte similem fortunam, incruentis potiùs conditionibus, quàm armis decernerent. Neque Zolkeuius astus imprudens fuit, nonnulla tamen quiescendi spe ac necessitate, cum per continuos labores exercitus propè fatisceret ; negotium exequendarum tractationū Christophoro Drusbicio mandat : peritō Turcarum linguæ, simulq̃ gnaro, quam frustrà, & cum periculo proficisceretur.

*Postea ut se-
cum conditio-
bus transiga-
tur petit.*

*Mittitur ad
ipsum Drus-
bicius.*

Ho-

*Ingens Tur-
carum aduer-
sus Polonos
impetus 2 O-
ctobris.*

Hostes enim detento eo, diem tantum illum noctemq; morati; dum nouæ copiae quæ ab ipsis iugiter accersebantur, aduenirent: prima vigilia ingenti mole oppugnatum castra Polona subeunt. ibi statim magnam vim sagittarum superfundere, perfringere pertinaciter stationes, inferre se munitionibus; laceßere, circumgredi, occurrere; clamore, sonitu, impetu. Aduersum quos nostri præsentibus animis, nil temerè aut trepidè, ad omnes aditus quâ signa ferri, quâ hostes ingruere videbant, centurionibus accurrentibus adhortantibusque, cæde ingenti irruentes excipiebant disijciebantque. Atq; peractum prælium, tum alias, tum maximè eo die fuisset; ni Tartarorum cohortes recentes & ad fugiendum aptiores, quæ equorum velocitate, quæ armorum habitu, itatarium grauemq; armis & labore militem, celeri fuga eluissent. Ita fugatis ad breue tempus hostibus, sub occasum solis, quia haud multum diei post pugnam supererat, Zolkeuius suos iterum simulq; hostes mouet.

*Neg, tamen
in castris ces-
sant 3. Octob.*

*Lixarū vir-
tus.*

Prosequeuti enim tota nocte euntes, concursationibus fatigabant magis, quàm conserebant pugnam; donec adulto iam die, tumultum statuis nostris imminentem adepti, validius subiectos incescerent. Sed nostris tantum iam animorum aderat, ut lixæ etiam calonesque cursu in summâ clyui

clyui enixi, primo impetu, peneq; vno agmine effusos pellerent. Nectamen desperabant de victoria hostes; sed equorum virorumq; nouis ac nouis aduentantibus copijs, proxima nocte prosequuti sunt euntes. Et nostri laboribus, inedia, diurnis nocturnisq; vigilijs, fessa agrè trahendo membra, corpora tamen animis, animos spe sustinentes, ibant non solum per aduersos hostes; sed vias etiam visu & memoria deformes, cum ab impotenti hostium irâ, quacunq; irent villæ, vicci, agri, diuina humanaque omnia vrerentur, popularentur; aut si quid frondosi herbiq; relictum ab ipsis fuit, id exorta eo tempore vis locustarum ambederet sædaretque, sanie, odore, contactu.

Militum calamitas.

Deficiente deinde nocte, immensam dies placentiam vimq; hostium euntibus aperuit. Longè ac latè ex aduerso & vndiq; fusis agminibus, aspiciebantur pleni hostium campi, terra aquarum egēs, & qui haud procul nomine Reut tenui alueo præterfluebat amnis, infessus ab hostibus; quò potus & aquatio prohiberetur. Locus quoque ipse ex prægressa æstate, incendijs torridus, in os, in oculos, non puluerem modò, tetrumq; halitū, sed etiam cinerem à longinquo, cum quid venti motum esset, & adferebat, & impulsus motu hostium, velut nube obtendendo cælum, solem eripiebat. Adeò vt neminem fuisse crediderim, cui

*Pertinax oppugnatio ca-
sorum 40-
Etobris.*

H

oculis

oculis potiùs, quam ratione pensanti, modo suorum inopem paruiamq; manum; modò ingentes hostium acies, effugere captiuitatem aut mortem credibile videretur. Igitur magno illic tumultu concurritur, & fronte, & lateribus, & vndiq; hostes ruunt, còcundoq; simul, in continenti agmine septos, nunc sagittas iaculaq; emittere: nunc inferre se munimentis: quidam arripere currus, dirimere carragines, & aduersùs resistentes cominus niti. Nostri contrà proturbare telis, pellere gladiis, tormentis disijcere. illis diu optata si paululum adhuc tetendissent victoria; aut si emississent insignitius dedecus & flagitium: nostris, dura seruitus, & extrema salus addunt animos. nec vulnèra iam aut sanguinem morantur, vir virum amplexi, prehentant tela brachiaque; & exspirantes cum integris cadunt. Neque tamen peruaferunt hostes, sed sædius quam accurrerant pulsi, non pugnando tantum perierunt: sed cum in confertos, propèque subeuntes tormentorum hiatu, magna vis plumbearum glandium effunderetur; suomet ipsi certamine, terga impeditentium fugam, cædebant prouoluebantque. Nostrorum sex tantum pedites, audentiùs fugientes secuti, circumuenti sagittisq; confixi, cæteros ad obsequium exemplo firmarunt. Exhausta sic die, nox deinde quietum iter dedit.

*norum
tus & con-
nia.*

*Tartarorum
insignis cla-
des.*

*A Polonis sex
tantum pedi-
tes amissi.*

Postero

in Polonia gestarum.

59

Postero die propè fluuium Kobiltam nostri confederunt, intenti interim paratiquè, si quid hostes mouerent: verùm ex illo die valida abstinerunt oppugnatione. concursationes tantùm erant, quibus vique ad lucem alteram turbabant fatigabantque euntes.

Hostes iam remissius agunt 5 Octol

Illà die prælum tentatum, sed cum vix quadraginta amplius itadia nostris ad Nestrum superessent, visq; octo dierum & necessitates humanæ nihil proficerent, neque nostros aduersus omnia duratos frangerent; desperata victoria Skinder-Bassa cum Galga mæsti manserunt. Kantimiro tantum cum parua parte copiarum à tergo instare iuissum, carpendoq; postremum agmè domum prosequi euntes. Sed vrgentibus iam rem Polonam fatis, cum priorum repente oblitus, ad securitatem negligentiãque verteretur miles, nimium domesticò laborauit, imò labauit malo. Magna fæuaq; angustia, cum antea, tum maximè per quatrìdium & tres noctes tenebat exercitum. iam solita alimenta deerant, eoq; inopiæ ventù, vt miserandis cibis, mandendo equos cæteraque animalia, quæ fæda in vsum vertit necessitas, propulsaretur fames. Et superato utcunque hoc vno consilijs malo, sitim tamen somnumque natura vinci non sinebat, cum alij tædio potus & vulnèrum inter cadauera sponte procumberent: alij so-

Skinder-Bassa & Galga desperant de victoria.

mno fessi cadentesque, nullo ad resurgendum
 nisu, quasi exanimis linquerentur. Sed super alia
 alijs diebus tolerata, iam hoc ultimo nouissimoque;
 vespere, & tormentarius puluis, & aqua rursus
 deficiebat euntes. nec aliud quo hæc simulque; an-
 tiqua mitigarentur supererat, quam pauci adhuc
 tædij via, ac vicinum limen patriæ, vbi post ali-
 quot horas, pleni gloriæ priuatæ publicæque, cõ-
 potes commeatum fortunarumque; considerent.
 Consummare igitur quam ocyus iter, necessitates
 & Duces Centurionesque suadebant, cogeant.
 Cum legiones repente incessit seditio, præcipuâ
 causâ, ob direptas olim in Cetsora res sarcinasque;
 militum. Nam lixæ remedium præteritorum, &
 retinendæ prædæ, solam fugam rati, quamprimû
 subtrahere se è castris parabant: moti adhuc in
 itinere non obscuris sermonibus & minis quorû-
 dam, qui exitiabili cõspiratione recuperaturos se
 sua strepebant. Constabat tamen lixis eousque; ob-
 sequiû & virtus, atque vt à præfectis iubebatur, ita
 in ordines, stationes, vigilias ibant. Erupit sce-
 lus, cum milites, nolle progredi, Centurionibus
 obniti, retinere, impedire alios, cernerent; tunc
 enim altius coniectantibus timor quoque cum
 conscientia redibat, quâ apud delinquentes in-
 longum memoria manet. Itaque & ipsi, primo in-
 ter se congregari, stationes deferere; dein exuere
 imperium:

*Seditio in
 castris.*

*Lixarum sce-
 lus.*

imperium: postremo, cum iam nec fas, nec fidē,
nec periculum pensi haberent; data testera, vt nu-
mero validiores, quod reliquum diripiunt fugi-
untque: stupentibus rectoribus, quod tumultus
initium? quis finis? qui accurrentes ad subita, fu-
gientes increpant, prehensant, retinent, aut si alijs
flecterentur consilijs, metantur castra. Sed initio
rapiendi orto, difficilis vltra moderatio; & non-
nullorum quoq; diffugijs, latius per omnes scelus.
Itaq; non illi, non Centuriones ius obtinent, ni-
hil salutare iam non modò ad animum, sed ne ad
aures quidem admittentibus, quisq; sibi timore,
exemplo, sit flagitij dux aut comes.

At verò Kantimir cum tumultuari in castris, *Kantimir tu-*
cunctaque rapina & tenebris misceri à transfuga *multuantes*
comperisset: haud dubius occasionem sibi oppor- *aggreditur.*
tunam, prosperè gerendæ rei offerri, accersitis
Skinder-Bassæ, Galgæ, & Valachorum cohortib;
discretos animis viribusq; aggreditur. Depelle-
batur vtcunq; à nostris prima vis; sed alijs irruē-
tem vim hostium non sustinentibus, passim pars
cateruatim; pars vitata frequentia, quasi prom-
ptiores latebris, diffunduntur. Sed neq; fugæ iter
patuit, cum à tenente circum omnia hoste, vinci-
rentur, perimerentur, maximè circa ripam Ne-
stri, vbi manus etiam hostium elapsi, profunda
hauriebantur aquâ; paucis tantum scientia vel
audacia auxiliante.

*Zolkeuij expi-
tus.*

*Konecpolicij
& aliorum
militum for-
tudo.*

Zolkeuius vbi rem perditam videt, immemor
fui, memor gloriæ, obiectans se hostium telis ca-
dit. Centurionem leuare eum oblato equo vo-
luisse constitit, sed ille districto acinace, transuer-
berare equum volens, leui tantum per ætatem
ictu, vulneratum repulit. postea vbi densissimæ
hostium manus contendens, neq; ætate, neq; cor-
pore par; præcisâ etiam, vixque cuti adhærente
dextera, ignorantia nocturna opprimitur. Sensit
Konecpolicius collegæ calum, atque vt fortissi-
mum quenq; suorum noscere poterat: Nostrum
iam, inquiebat, opus est milites. agitedum, dis-
pulis alijs, amisso imperatore, vos præcipui me se-
quimini. hic aut propè te Zolkeui cadendo: aut
victores redeundo, maturam, te, nosque de-
ferentibus, vltionem aut poenitentiam accelera-
bimus. Mutatis per hæc animis; tum quia præ-
fecti & centuriones similia quoque militibus suis
ingerebant, plurimi restiterunt. sed pertinatior
quàm felicior ipsis virtus fuit. quamuis enim ali-
quot defuncti prælijs, confertos transijssent ho-
stes; in novos tamen incidendo, clausi aduersum
circumfusos, & fæsi cum recentibus iterabant
pugnam. Tandem apertâ sibi ferro quisq; in su-
am partem viâ, cum distracti, singuliq; aduersus
plurimos imparem dimicationem inijsent: labo-
re & vulneribus confecti, in manus hostium ve-
nerunt.

nerunt. Morabatur adhuc Konecpolscius & Dinophius victoriam, iamq; interfecto Dinophio, multis nequicquam hostes circa Konecpolicium conatibus captis, cum notesceret ducem esse, velut ad prædam conuersi, neglectum in acie deserunt. dant interim cuidam negotium, vt gnarus linguæ, simulata fide ductorem ei se itineris offerendo, viui quoquo modo potiretur. exequitur ille vt iussum erat, deductumq; in angustias tradidit hostibus. Postero die vbi primum illuxit ad legenda spolia, stragemq; suorum & nostrorū visendam hostes insistant. vbi Zolkeuius inter promiscuas cadauerum strues repertus, & canitie præque cæteris angustiori facie agnitus, præbuit victori iugulum. Nullum caput adeo fixis attentisq; oculis lustrasse Skinder-Bassiam proditur; siue explenda lætitia, antequam illud Byzantium mitteret: seu splendor maiestatis etiam in mortuo, quamuis immitem animum imagine tristi confuderat: vel etiam viri inimici, fortunæve recordatio, & sibi conscia supremi mens, ferum animum aspectumq; retinebat. breui enim & ipse quasi supremo edito opere occubuit. Hæc fuit insignis atque inter paucas memorata Polonorum fortitudo & clades.

Sed me quominus progrediar, indulgentiâ Ducum, lixarum impunita olim in Cetsora licentia,

*In Cetsora per
riculosiorne
fuisse seueri-
tas an clemen-
tia:*

an pereundi perdendiq; omnia, inuicto tot prælijs exercitui causam adduxerit, paulisper retinet. Grande enim in bellis momentum disciplina, rigorque & seueritas vnum armatæ multitudinis munimentum. alibi locus est clementiæ, imperator in castris timebit nisi timeatur. Neq; ista abnuo, scire tamen quod ex vsu, quàm quod in vsum promptius; quoniam & consilio non ita diiudicari potest, quid optimum factu sit; quàm euentu pessime factum esse, si factum est. Atqui seueritate admisissent tunc Duces, quàm vindicassent scelus. Quid enim futurum fuit, si illa calonum lixarumq; plebs, cui nec boni intellectus, nec mali cura, multa & valida; ne in supremo articulo extrema timens, sublata spe veniæ pertinacius accenderetur? Reformidat animus euentum ominari, si in confusione illa & lymphatico pauore, conspiratio aliqua vindices petiisset. Næ tunc fracta seueritas & sine viribus maiestas iacuisset, cuius remedium erat nescire scelus, quo si intelligeretur pereundum omnibus fuisset. Prohibuit id ingenium Ducum, eoque modestia ac tempestiua indulgentia effrænem multitudinem perduxit, vt insignem etiam frugem virtutis fortitudinisq; impunitate ediderit. Verumenimvero dum exercitum ex legem ac velut bicipitem considero, discordia nostra est, irreuerentiaque Ducum

Discordia.

Ducum, quæ rem Polonam afflixit. Sic stare, sic instrui acies iubetur; certæ victoriæ prauitas damno fuit. ire carragine decretum est. pergere duces vltra iubent, tu reluctaris. Adeo nullibi obsequio pares, & bello maius impedimentum quàm auxilium sumus. At dum paruimus, nunquam dolis, nunquam aperta acie, nunquam æquis, nunquam iniquis locis laborauimus. Tormenta, sagittas, saltus impeditos, malè concors miles timere potest; mille acies grauiiores, quàm Turcarum Tartarorumq; auertit auertetq;e, modò sit illi, constans eius quâ omnia crescunt, concordia, auctoritatisq;e imperatorum, quia à Deo, cura.

Interea per Poloniam, nondum cognito, qui fuisset rerum exitus in Valachia, multus vbiq; sermo, cætus passim per vrbes, per templa, per fora, per compita visabantur, vario super exercitu rumore differentium. Alij obsessum quidem, nondum tamen extremis premi, aut comineatu destitui, vulgabant, credebantq;e: alij velut præsa-gientibus animis, silentio rerum vt sit grauiora metuebant: alij iam aliquid ab alijs accipiebant. sed ad tempus ista conficta, dum Comitia instarent, quò liberior indictio statueretur, exigere-tur, omnia vt falsa aspernabantur. Tum verò vbi intulit sese in Russiam hostium exercitus, & vi-

*Rumor per
Poloniam.*

*Tartari ir-
rumpunt in
Russiam.*

Stanislaus Lubomirscius.

Tartari Leopolum transeunt.

Terror ubiq.

*Laurentius Gebicius.
Martinus Syfconius.*

spe furens ac præceps: atroces iam nuntij passimque per omnia terror, re subitâ, & quod ad ar-
cendum nihil prouisum aut paratum. Stanislaus
tantum Lubomirscius Comes in Vîsnic, Capita-
neus Sendomiriensis, paucis ante diebus, suppe-
tias exercitui ferens, strenuè aliquot circa Leo-
polim locis, in populates prædamq; agentes im-
petum dedit: sed nec multitudini, nec in immen-
sum diffuso agmini par, recuperata insigni præ-
dâ, præsidio Leopolum concessit; indeq; solutio-
re curâ suggredientes aliquot eruptionibus retu-
dit fuditque. Sed hostes abstinentes acie, Leopo-
lim transgressi Grodecum vsque, omnia armis,
cædibus, incendijs, direptione proterentes, ter-
rorem latius porrexerunt. Fit vndiq; fuga agre-
stium, omnis sexus, omnis ætas; illustres, ignobi-
les in vrbes congregari iamq; alij pauentium glo-
bis immixti, animum vultumq; conuersi, quisque
sibi quisq; alteri consulere: alij nequedum com-
perto, quosnam illa vis abstulisset; hic fratrem,
propinquum ille, alius parentes lamentari. Cum-
que malis sicut ingentibus, ita subitis tumultus
& fletus obsistereperet, Pontifices quoq; inopes au-
xilij humani, populum ad Deum & vota vertunt.
Et Laurentius Gebicius Archiepiscopus Gnesnensis,
ac Martinus Syfconius Episcopus Cracouiensis,
repetitis supplicationibus, ad exemplar triennis
olim

olim religionis, præeunte verbis clero, cum coniugibus liberisque paruis, veniam irarum caelestium, finemque cladis, Deum, Diuos etiam Indigetes Tutelares exposcere iubent. Audita preces, & abscessere terra barbari, tanquam bellum potentioribus copijs differrent.

Tum verò haud multò post, palam facti viui mortuique, quos & bellum & præsens rapina abstulerat, iterum priuatas per domos complorabantur. Sed non alia quam *Herburtea*, *Zolkenij* vxor, non visentium modo, sed etiam reputantium, animos & oculos miseratione afficiebat. Huic nihil non luctuosum, interfecto marito, simulque incerta spe erepto vnico filio, quo cum nec luctum, nec oculos solari valeret; infelix matrimonium pertulisse, vitamque atroci dolore, iam è vita exempta trahere credebatur. Atque vbi alatum cadauer, quod per vulnus illi ad *Bycinum* inflictum cognouerat, cruentum truncum amplexa, cuius sortem concesso periculis filio onerasse videbatur, seruabat sanguinem vestesque resperfas; inops vidua, anxia spei, implexa luctu bino. Portatum deinde militum humeris cadauer, monumento vrbeque quam viuus cognomento suo condidit sepultum est. Is finis erat viri; ætas septuagesimum annum excessit. honores priuatos publicosque miles primum sub *Ioanne Zamoscio*,

*Herburtea &
xor Zolkenij.*

Zolkenij elegium.

deinde Magister equitum meruerat; defuncto eo, Generalis exercituum Dux factus, moderatè quoad imperium tantum; postquam Cancellariatum, nimium vsq; ad finem vitæ multorum inimicitijs conflictatus est. propensiore tamen Regis quàm ciuium fauore fuit. Moschouiticis expeditionibus clarus, vbi hostilibus armis, captorumq; Principum catenis, Basilij Suiscij Imperatoris Moschouix, Ioannisq; & Demetrii fratrum suorum, grauem Regi Sigismundo triumphum dedit. Innocentiam iustitiamq; eius non argueres. nec minor ex eo gloria, quod incursionibus Kosacoru, sæpius turbatam pacem, mirè cum Turca temperauit.

*Comitia.
Senatores
creantur.
Matthias Lubin-*

*scius.
Georgius Dux
in Zbaras.
Ioannes Comes
in Tecyn.*

Dies deinde Comitiorum Varsauiæ iij nonas Nouembris indictorum aduenit. Creati Senatores. in Episcopum Chelmensem Matthias Lubin-
scius notæ pietatis industriæq; vir, fæcunda etiam fratrum suorum claritudine, surrogatus est. collegio secularium delecti, Georgius Dux in Zbaras, & Ioannes Comes in Tecyn; celeberrimi prudentia, rerumq; ciuiliū peritia. qui quamuis per auitas opes gloriamque non concupiscerent, inclytæ tamen vtrorumque familiæ honos auctus est, oblato principe in Senatu ordine, vni Castellanatu; alteri Palatinatu Gracouiensi: quò vtrorumque virtutes, loco, officio, societate cōnexæ,
in su-

in supremo fastigio campum exemplumq; haberent. Posthæc de bello Turcico senatusconsultata fiunt, & absumpto recenti clade Duce, quinam surrogaretur quærebant. Omnium ore Ioannes Carolus Chotkeuicius Palatinus Vilnensis, idemque Generalis exercituum per Lithuaniam Dux celebratur, cultu habituq; moris antiqui, prospera ubiq; fortuna, & quod necessarium tunc videbatur, disciplinæ militaris custos. Hunc Stanislaus Lubomirscius Comes in Vilniæ collega adscitus, aliquot expeditionibus experti in patriam amoris, miro quoq; ciuium fauore, modicâ seueritate, & exercitui comitate non ingrata. Designati insuper, quorum consilij conditiones pacis & arbitria belli tractarentur. Exercitus sexaginta milium sufficere visus properatusque. Præter stipendiarios, delectus etiam nobilium concessi, quoque paratior foret nobilitas, vt lustratio singulis annis, suis Palatinis fieret, plenius quam antea & vberius cautum. Facta ibidem militi spes honorationis militiæ, neue vlli dum in castris ageret lis noxæ esset, aut stipendium capto vel mortuo patriæ causa intercideret, sed ipsum, liberos, vel propinquos moraretur, decretum. Verum nihil æquè fatigabat, quam pecuniarum conquisitio, inopi pene regno, cunctaq; scrutantibus optimū visum inde occurrere, quod inopiæ causa erat.

Duces belli designantur.

Ioan: Carolus Chotkenicius.

Stanisl: Lubomirscius Comes in Vilniæ

Recuperatores vulgo deputati.

Lustratio.

*Rogatio ad-
uersum luxum*

Ita & aduersus ambitionem militarem, & domesticum luxum rogatio promulgata. Illa scitum, ne auro argenteo vel calatus compareret in castris miles: altera, statutis ante rerum pretijs, ne promiscuus fieret sericorum usus, cautum, quæis in immensum tædijs exquisitioribus, vulgi etiam portatu, pecunia profundebatur. Sed vetabitur istud & retinebitur, palamque tantum fiet quibus vitijs impares sumus. olim autem nobilitatem virtute & hac vna notâ à plebe discriminatam ferunt, nunc etiam humilem faciem illustis fucus velat, quo idque præcipuum esse debuerat virtutis familiarumque discrimin, ne foediora recenseam passim miscetur & confunditur. Actum præterea, ut legati petitiu externa auxilia mitterentur.

*Legati ad ex-
teros Principes.*

*Grochouius.
Przeremscius
Osolinscius.
Zeronscius.*

Romam Achacius Grochouius Secretarius regis: ad Imperatorem Maximilianus Przeremscius Castellanus Siradiensis: in Angliam Georgius Osolinscius Palatinides Sendomiriensis: ad Status Hollandiæ, Petrus Zeronscius Secretarius regis missi. egregij omnes, & qui præter alias virtutes artesque, facundiam quoque ferrent. Hæc sunt præcipua arbitrio Senatus decreta.

*Thomas Zam-
oscius.*

Allata deinde Zolkeuij honorum insignia, claua annulusque Regni. vtraque per Thomam Zamoscium Palatinum Kiouia, in frequenti populi, Quiritum, Senatorumque corona Regi reddebantur:

tur: oratione egregiè culta, quâ laudatis Brutorum, Deciorum, Marcellorum penes suos milites mortibus; parem Paulo Æmilio Romano ad Cannas, Imperatoris nostri exitum facundè memoravit. erectis ad tam magnificam orationem prorsus omnibus; quam adhuc altius patris in illo imago, Senatorius viri decor, vultus, habitus, gestus dicentis, attendentium animis adfigebat. Sed hæc eius verbis per Poloniam excepta vulgataque edere supersedeo. Clava Chotkeuicius; annulo publico supremoque Cancellariatu Andreas Lipscius Episcopus Luceoriensis honoratus, vir iudicio, calamo, & ore magnus, pro veritate firmissimus, cuius amplitudinem frustra stringerem hoc angusto spatio vel manu.

And. Lipscius

Eodem tempore, Praga Bohemorum à Ferdinando Cæsare Regeque recuperatur; ausa in eum rebellionem, dum virtutes Principis veretur; nec alijs satis quæta, quamvis scelera segniter ferentibus. Nam & in Rudolphum cæpta erat seditio. petulantia tantum gentis, cum luxu, libidine, facinoribus, in numerosas superstitiones procax, vixque illis ulterius retinendis par; vi ac obsidione ad firmanda diplomate iniqua, legesque sibi libitas eum adegerat: velut amore quietis à Catholicis, curaque publicæ pacis; ipsis inter tot religionum vocabula discordantibus; nisi quod inter malos

*Praga à Ferdinando recuperatur.**euenit,*

*Causa rebel-
lionis eius.*

Exitum.

*Frider. Pala-
tinus Rheni.*

*Legatio Bo-
hemorum, Si-
lesiorum, Mo-
rauorum.*

euenit, vt aduersus alium, concordēs similitudi-
ne coeant. Neque id Matthiæ Imperatori pro-
batum; sed iniquissimam rem questus, vltra non
anquirebat, ipsis tamen agentibus ferentibus cun-
cta libidine ac permissu: donec contrā fas iusque
exstructis duobus templis, vno in Archiepiscopi,
altero in Abbatis Pragensis fundo, vbi æquitate
apud recuperatores vincebantur, perduellionem
aduersus Ferdinandum induerunt. Exinde ar-
ma rapiunt, fasces Regni inuadunt: initio à pro-
iectis in præcep̃s per fenestras iudicibus factis;
prono quoq; in icelus populo, quasi prætextu re-
ligionis; sed nisi pollutum obstrictumq; meritis
suis Regem haud passuro. Mementoq; tempo-
ris flagrabat ingens belli lues: circum prouincijs
desciscientibus, Vngaria quoque contacta: æquē
graui hucusq; flagitio. Dein' hoc ipsum quod nul-
lus regentes reget, Fridericum Palatinum Rhe-
ni vltro sumere regium insigne impellunt; non
tam quod ipsum mallent, quàm quod non habe-
rent alium: facili iuvene, dominationis cupidi-
ne, & futurorum incurioso. Sed pulso eo hoc
mense, non aliud subsidium fuit, quàm pernici-
tas equorum, quēis se & coniugem abstulit, quā-
que antea Regem, tam postea propē exulē gessit.

Peracto bello, incertum an nescij, ad Comitia
tres legati, Bohemorum, Silesiorum, Morauorū
(nam

(nam & ij descuerant) Varſauiam veniunt. in Senatum introducti, Statuum ſuorum nomine variam orationem habuerunt, partim ſe purgando de interceptis olim apertisq; Regijs ad Cæſarem literis, tum ne ſuo conſilio excitari contra Polonos Turcam; aut propoſito exſcindi Catholicam religionem credatur: partim poſtulando ne ſe veteres ſocios à Liſſouiſibus, olim ad Cæſarem tranſgreſſis, ſædius ſpoliari vexariq; quàm hoſtes patiantur; & cum auxilia aduerſus Imperatorem non implorent, aduerſus ſe etiam milites contrahi non permittatur. Finita legatione, dimiſſi benignè, fæderaq; & pacta quæ cum maioribus ipſorum intercederent, ſeruare velle Polonos reſponſum.

Sequitur immane portentum, quid exhorreſcis calame? tunc primum in Polonia auditum viſumq; nefas, hoc ſolum ab ipſa excuſatum, quòd nemo alius illi ſceleſto nomen aut conſcientiam commodauit, quæ ne per flagitium quaſuiſſe famã putetur, æterni potiùs ſilentij poena, cū illo incendiario templi Dianæ, quàm nomine aliquo affccero. Intrabat ex more templum Rex, Deo primum ſanctimoniaq; attentus, antequam animum ad curas Regni verteret; & ecce nefarius foribus abditus, aſperatum faxy ardentemq; malleum roſtrato mucrone in caput præ-

*O ſcelus, ó por-
centum.*

K

tereuntis

Lucas Opalinskius.

Famulitium Martini Siscouij.

*Ioannes Kalinskius,
Bonauentura Rogascius.
Ioannes Zebrzydounius.*

tereuntis attollit; opportuno tunc flagitio, cum Vladislaum Principem, Primoresque sequentium occupatos, ipse etiam porta paulum ad lumen adducta moraretur. Sed ô præsides Angeli, vosque sacrata altaria, ictum fallente manu, leui tantum genæ vulnere bis in humerum manubrio illisit; tertium iam ad verticem directum, obuersus Lucas Opalinskius, Marschalcus Curiae virga retinuit infregitque. Concidit Rex graui casu per læue & lubricum pauimentum ante tabernaculum sanctissimi Sacramenti à se verè regio sumptu recens extructum; omnibus parricidam persequentibus, ac maximè Vladislao filio, quem à cæde percussoris, pietate & dolore violentum, quanquam inflicto iam percussori vulnere, agrè alij tenebant; non miseratione aliqua, sed quò suspecti latius sceleris indicio reus seruaretur. Interea Martini Siscouij Episcopi Cracouiensis famulitium (quod illius splendidum semper illustrium virorum aulae adest) prouolutum iacentemque Regem aspiciens velox accurrit. Atque hærentibus cunctis, cum auxilium periculi cuiusq; aut suspicionis tardaret metus, primus Ioannes Kalinskius, adiuvante per manus Bonauentura Rogascio, acceptum medium terra adleuat: accurrit & Ioannes Zebrzydounius Ensifer Regni, simulq; voce, manu, stricto gladio exprobrat scelus.

Ius. Opertum deinde gladijs manibusq; familia-
res Episcopi ad ipsum, qui tunc peracto sacrificio
in scius omnium in occursum Regis sacello pro-
dibat, deducunt. Is Regem sanguine oblitum
cernens, attonitus silentio mox fletu exceptum
compellans: Non hoc, inquit, optime Princeps
infelicibus votis inuocaui, vt superstes, labem
insuper hanc in patria cernerem? Hæccine tibi
pro omnium cura summaque bonitate redditur
gratia? hæccine sunt tua pro salute Reipublicæ
tot exantlantibus laboribus præmia? sicine tibi pro
summis in Rempublicam meritis & beneficijs re-
penditur gratitudo? Noster is dolor, nos isto
sanguine perfusi, cum vulnere tuo nostrum om-
nium capita Reique publicæ salus peteretur. Simul
amplexus ægrum premebat vulnus, adstabatque
attonitus, miserabili inter sanguinem & lachry-
mas prospectu. quippe cuius periculum morte
sua redimere piissimus Pastor optaret: hunc
ipse in templo temeratum, tanquam victimam
ad aras fauciam foueret, voce, complexu; verè
animo Senator, pietate Sacerdos, amore Cuius.
Neque deinde abscessit à latere; sed post cum
nonnullis aduenientibus Senatoribus in palatium
comitatus: felicitatem etiam diei primus in Ec-
clesia, in qua Rex vulneratus, supplicationum ho-
norauit celebritate. At verò nondum planè vul-

*Terror per
Varſavian.*

gato Regis periculo, pauentia fora templaque,
& per urbem tumultus. nam neque ſcire quid
contigiffet, nec percuntantibus ignari reddere
reſponſum poterant: & clamor ubique, diuerſa
rogantium, incerta reſpondentium: & concurſa-
tio incidentium aliorum in alios, quaſi hoſtis ur-
bem teneret, populum affecerat, (de Tartaris e-
nim tunc eorumque irruptione rumores ſparge-
bantur) quouſque attentatum Regem parrici-
dio, ſed ire in melius valetudinem, rumore, mox
aſpectu, (nam ut ſedaret motum videndum ſe
præbuerat) incolumem etiam eſſe pernotuit.
Dona ob hæc templis decreta gratesque Deo.
Præmium ſubleuanti à Regina torques aureus,
trigintaque millia ſeſtertium, à Senatu bona per-
cuſſoris data. Nam Rex clementiſſimus caſum
æquo animo ferebat, nec quicquam acerbum vel
indignum locutus; quinimo pro percuffore de-
precando, pro ſua parte veniã illi ac velut innocen-
tiã donabat: obſtinarunt tamen omnes, & quam-
uis nefariũ palam mente captum conſtaret, hoc
tamen illi veniam omnem ac miſericordiam exe-
merat. Et cum nec tormentis, nec ignibus, nec
vllis pœnarum experimentis quiſpiam conſcius
inueniretur, ille nihilominus iudicio publico da-
mnatus, omnibus ſpectaculo deſtinatur. Itaque
arreptum lictores, candentibus hinc inde forci-
pibus

*Supplicium
parricidæ.*

pibus lacerantes extra urbem deducunt. ibi emi-
nenti ad id facto theatro aptatam malleo rostra-
to dexteram flammis adurunt, nudisque iam flu-
entem ossibus cum laua amputant: postea admo-
tis quadrigis distentum illigant, equisque in di-
uersum concitatis, lacerum corpus, laniatasq; par-
tes cremati, ac cineres disijciunt.


Fine anni vulgantur prodigia. *Prodigia* Terræ motus
non aliâs latior, Leopoli, Cameneci, Luceoriæ,
Halicij, & per alia ignobilia oppida. horridior
adhuc crebriorque per Valachiam; vbi etiam tel-
lus decussatim dimota fuit, indeque scaturigines
fluxisse memorabantur. Item ex villa Sytkovce
ad aliam sponte transiens cliuus.

Iisdem diebus excursione cohortis, quam Du-
ces in Zbaras hostibus prædas abigentibus obie-
cerant, Turcarum legatum ad magnum Chamum
euntem interceptum accepimus. Sed ego
cum fine anni hic quoque rem
meam feci &
FINIO.


Errata sic corrige.


- Pagina 8. versu 4. Machiam pro Matthiam.*
12. v. 19. asuescendi *pro* assuescendi.
18. v. 19. premij; *pro* præmij;
20. v. 11. perpulerunt *pro* perpulerunt.
19. v. 16. fuga *pro* fugam
34. v. 7. variaq; *pro* vanaq;
35. v. 7. quod *pro* quò,
38. v. 5. ui *pro* ni
55. v. 18. accersurum *pro* accessurum
57. v. 1. clyui *pro* cliui
57. v. 12. herbiq; *pro* herbidiq;





17425/2





15.537

7523
—
2

